

摘藻堂四庫全書薈要

集部

欽定四庫全書薈要

集部  
四明文獻集卷二

臣董誥詳校

詳校官助教臣謝登雋



欽定四庫全書舊要

四明文獻集目錄

卷一

記

序

跋

卷二

赦文

詔

卷三

表

露布

檄文

卷四

制

祭文

樂章

卷五

誥

墓誌

贊

詩

臣

等謹案四明文獻集五卷宋禮部尚書鄞

縣王應麟撰明同郡鄭真采輯陳朝輔又增

益之通一百七十餘篇制誥居十之七應麟

著述宏富所撰玉海等書已別著錄其詩文

有深寧集一百卷世久失傳茲編蒐輯遺亡

僅存什一而文關制作多可與史事相參考

宋史本傳謂度宗即位應麟草百官表循舊

制請聽政四表已上一夕宰臣諭旨增撰三

表則此七表者先進前四表次進後三表也

考之是集則第一表至第二表乃景定五年

十月上第三表至第七表乃十一月上與宋  
史本傳互異又宋史度宗本紀載賈似道罷  
都督予祠在德祐元年二月徙居婺州又徙  
建寧俱在七月而由揚州貶歸紹興實是在  
年五月四日見於是集責賈似道歸里制亦  
足以補本紀之闕又不徒以文章論矣乾隆  
四十三年二月恭校上

總纂官臣紀昀臣陸錫熊臣孫士毅

總校官 臣陸費墀



欽定四庫全書薈要卷一萬五千九百九十二集部

四明文獻集卷一

宋 王應麟 撰

記

周山川圖記

詞科第一場  
二月十二日

相古先民有周德隆澤洽用造區夏章亥所步莫不砥  
屬建橐戢武斧藻王度四嶽河海咸秩無文名頌曰般  
哀時之對鄭玄釋允猶翕河之語謂按山川圖次序祭

之孔氏正義謂共為一圖雖畿籍方志謹軼亡傳謹粵  
繹舊聞而為記曰大極肇分有浮而清有沈而奧卷石  
之積結為巍巍雲蒸雨霈萬物育焉勺水之積融為浩  
浩源迤流行萬物潤焉聖人有作迺封迺濬迺琴迺滌  
肇稱明祀為民祈禱若封禪于黃望秩于虞旅祭于禹  
維見可觀然風后受圖九州始布山海有經為篇十三  
圖牒猶未詳也蒼姬開統憲章稽古以地圖知山川之  
數職于司書以地圖辨山川之名物職于大司徒以九

州圖周知山川之阻職于司險天下之圖職方道掌其  
山鎮曰會稽衡華曰沂岱嶽及醫無閭霍恒其大川曰  
三江江漢曰滎雒淮泗曰河涕涇汭及漳虜池嘔夷又  
有山師川師掌其名山虞川衡掌其守艮兼兌麗目擊  
掌運抑猶以為畧也卑高小大則其位殊次主屏攝則  
其數異我是以有秩祭之圖河先海後辨源委也九河  
合一同等列也嶽視三公瀆視諸侯禮文別也天子四  
望諸侯三望名分嚴也按圖定序因序歲事於是宗伯

為壇典瑞奉璋牧人毛牲校人飾駒乃奏蕤賓歌玉鐘  
舞大夏服毳冕而祀焉上下有章無越望之僭祝史荐  
信無矯舉之愧山澤通氣歆馨降嘏百嘉鬯榘四極艾  
寧盛哉饒乎適觀詩序祀於巡守時邁其邦爰及柴望  
意者上訓夾車道圖詔事其在斯時與攷之傳記天下  
名山五千三百七十名川三百支川三千周國其在雍  
州而立吳嶽為西嶽三代居河洛而四瀆咸在山東公  
羊春秋謂天子有方望之事何休以為望祭凡三十六

所若義之脩而禮之藏獨於般詩見之夙夜必祀作周  
恭先丕天之大律也下逮穆王大朝黃山披圖視典殷  
武疏述鄭玄之言亦參周漢之域驗山川之圖孔安國  
為漢博士具見圖籍山川所在學者尚有稽焉春官掌  
三辰之法猶神示之居注亦訓猶為圖仰觀俯察兩盡  
其摯矣雖然德懋而山川寧道公而百川理懷柔河嶽  
厥有本元無設官為極之意則經野之圖不足以致治  
無敬德祈天之忱則卜洛之圖不定以永年是圖之陳

左右也顧岐陽豐水而念王業之孔艱瞻洞庭孟門而  
監地險之難恃江漢想廣及之德南山思疆理之功清  
明在躬與山川出雲同一運化然後能靈承于旅惟典  
神天業我濛鴻洋洋如在玉帛云乎哉茲圖外之眇指  
敢正列其義以詔萬世謹記

按辭學指南云記者紀事之文也西山先生曰禹貢

武成金縢顧命記之屬似之文選止有奏記而無此體  
古文苑載後漢樊毅修西嶽廟記其未有銘亦碑文之  
類至唐始盛獨孤及風后八陣圖記今之擬題倣此

漢百官朝會殿記

皇漢稽古建官立三公應台鼎司徒為丞相之任贊元  
穆綽位冠列辟中興二葉憲度鴻明號登承平越十五  
載更作司徒府于開陽門內光觀壯麗萬國具瞻迪惟  
詢謀僉同虞書垂訓謀及卿士禹範陳法時有大政政  
有大疑必集羣臣議之咨一相決之迺於司徒府建朝  
會之殿以繹師言審國是煥乎一代閎規也棟宇修廣  
史策無述獨於周禮注漢官儀律厯百官志注概見顛  
末庸識其事有裨史闕太微中居列宿環拱聖王正表

著之位辨庶陞之等法序天也蒼姬制禮天子三朝燕  
朝列路寢之庭太僕掌之治朝居路門之外宰夫司士  
職之惟時外朝眡內為重雉門外者小司寇以詢萬民  
三公州長暨羣吏叙進臯門內者朝士掌建其法孤卿  
大夫暨衆庶咸列蓋建朝于外則尊卑之分肅咨謀于  
朝則上下之情孚公聽並觀計謨定命聚精會神之地  
其可忽諸漢監秦轍達聰垂明高皇肇基下詔長樂相  
國建議寔始權輿或大議殿中或會議溫室朝堂百僚



之位有蕭曹魏邴之謀謨公卿以下朝會坐載於成紀  
建始元年之注坐而論道流風猶存丞相府有四門隨  
時聽事坐未央廷中單于拜謁體貌匪不嚴也然問望  
之計策則遣中朝持單于之語則視中朝具復廟之文  
則詔中朝臣議王嘉之事則下將軍中朝者丞相以下  
為外朝顧不與焉官府體分與周異矣黃霸問郡國計  
吏舉孝弟為一輩先上殿說者謂丞相所坐外朝之制  
略而未詳東都重熙卽憲周典德陽朝羣后象魏旌舊

章上儀祿容焜耀千古瞻詹公府輪奐未崇經之營之  
適新廣殿彤庭殖殖左城右平王侯更衣于殿之西位  
宁森嚴規撫璉敞堯衢室舜總章何以侈茲國有大議  
車駕親幸其殿則應劭之書可證百官會府公殿下則  
蔡邕之言可稽續志通紀熹平四禩臣光臣晃傳奏歷  
元乙卯詔書會司徒府議邕集所載在三月九日其位  
校尉東面侍中中郎將大夫千石六百石南面議郎博  
士北面戶曹令史西面中坐讀詔臣邕前坐侍中西北

近公卿與光晃問難朝章邦典賁然明著想夫三事在  
位百辟在廷周爰咨諏知畧輻湊帝暉下矚稱制臨決  
衡石公論著蔡羣疑匪同會同有繹而已故龍闕對峙  
棟題翬飛人不以為華鈴鼓不設扉闥洞闔人不以為  
簡鳴玉峨冕翼翼翔翔吏治否臧民生休戚天聰四闕  
無隱不敷受計則計吏數百人拜于庭中舉謠言則掾  
屬令史會于殿上宗輔弼以尊國體意深遠哉若迺論  
於白虎朝于雲臺見於宣明問于崇德隆寬盡下史不

絕書魚聽廣謀莫若斯殿康成釋禮魚述漢法於朝士  
曰今司徒府有天子以下大會殿亦古外朝於橐人曰  
百官朝會殿天子與丞相舊決大事是外朝之存者劉  
昭謂干寶之說殆未深攷小宗伯肆儀為位康成謂若  
今肆司徒府又非止為大會設矣蔡邕紬書東觀立朝  
會志未就詳莫得聞竊嘗考之周中朝聽治漢前殿也  
周內朝圖嘉事漢宣室也東都前殿為路寢嘉德為燕  
息見于張衡之賦而景秉傳云公卿會議常上殿訪邊

事若袁安班勇皆於朝堂上書會議又有召百官議朝堂詔百官大會朝堂亦外朝遺意通典曰周有四朝而言三朝者詢事非常朝也是殿其詢事之朝歟聘禮君與卿圖事康成曰謀事者必因朝其位君南面卿西面大夫北面士東面漢制蓋倣此云謹記

### 唐七學記

有唐觀人文化天下高祖太宗戢兵耆武尊右儒術綴禮正樂憲度著明庠聲序音鏘訇金石稽古建學厥制

維六玄宗續緒復增其一課試有法訓迪有師德藝兼  
該摠于胄監譽髦斯士雲合霧集豐規茂矩冠冕百王  
宜被厥文具詳登載謹參合百官選舉志儒學傳序六  
典會要而記其畧夫教亦多術矣開數路而翕受皇極  
之化也萃羣材而樂育菁莪之仁也帝治時邕成均肇  
建有虞養老庠分上下夏氏設教序列東西左右郊宮  
商學殊制作人造士匪一而足蒼姬之盛教典尤備國  
學合子弟太學食老更四郊有庠門閭有學或讀邦法

或習書數達材成德道化渾融祭義攸述為學有四保  
傳所紀為學有五學記之注曰內設師保外有庠序六  
學之制於茲可考治古逾遠彛憲無傳漢立三雍晉興  
兩學元嘉四學之叔天監五館之開名存實亡駸虜亡  
議惟唐文治炳蔚上軌成周鉏耒夷荒鴻業甫定生員  
之置肇于武德元年五月周孔之祠建于二年六月恢  
儒鄉學敷遺後聖爰暨貞觀駿惠前猷臨幸國庠延籲  
儒彥肄業之舍廣為千二百區著錄之生益為三千二

百六十員施于六葉增闢學館襲舊為七若三品以上子孫國子學教之五品以上子孫太學教之曰廣文以領國子生之業進士者寔維天寶九載七月乙亥之制曰四門以授七品之子及庶人之俊異者寔維元魏太和二十年之制律學昉于晉梁復于貞觀六年之二月又復于龍朔二年之五月越明年以隸詳刑而律令格式法例于是習焉書學昉于晉隋復於貞觀二年之十二月又復於龍朔二年之五月越明年以隸蘭臺而石



經說文字林於是習焉算學沿隋之舊置于貞觀二年復于顯慶元年越三年九月廢之以隸太史及龍朔二年復之以隸秘書而九章五曹綴術緝古之屬於是習焉訓導之職有祭酒司業博士助教直講孫其業也舉選之科有秀才明經俊士進士明法明字明算興其能也業成則丞蒞試不率則簿舉法嚴其訓也國子有五經博士廣文有知進士助教重其選也助教或十年始遷博士或十九年不易顯其任也生徒之數國子三百

人太學五百人四門千三百人書律及算總百十人元  
和三禩申命更定西京自八十至十人東都自十人至  
二人而國子學有大成上元二年初置二十人開元二  
十年復省其半若舍奠齒胄之儀皆行於國子學又本  
末先後之序也想夫紆袂鼓笥來游來歌鴻生碩師論  
難衍衍拱紱懷璽濡化染學玄武飛騎垂衿講習新羅  
百濟挾策吟誦豐芑燕翼之澤棧樸追琢之章政媿俗  
淳作周匹休猗歟懿哉鋪觀唐史立學闡教蓋非一端

左省弘文武德之制東宮崇文貞觀之規並置生員是  
為二館祕書小學以誨皇族內之學館以訓宮掖崇玄  
有學以習老莊郡縣諸生差列二等若崇化厲賢之原  
則自七學始以至龍朔改司成館垂拱更成均監司成  
宣業官名屢易茲不備載按鄭虔傳廣文寓治國子館  
李庾西都賦曰左立太學前到廣文選舉志止言六學  
何蕃傳亦云六館意者二學合為一與韓愈上表有七  
館之稱併書以識舊典謹記

慶元府學重建大成殿記

天子初郊見之歲法駕視學謁款先聖隣魯子子思侑  
饗建首善風四方罔不丕式彛訓越數歲吏部尚書洪  
公以敷文閣學士來牧四明秋舍奠于學顧瞻禮殿梁  
桷彫剥喟然曰大哉聖人之道於穆不已惠我无疆矧  
東漸于海遠遡洙泗簪紱之盛上儼鄒魯職在宣化弗  
惟道原是崇曷克稱明詔若稽郡垂舊夫子廟肇自唐  
貞元四年至今四百八十餘歲矣元氣回復理若有待

明年寔咸淳紀號之六年迺鳩工飭材而鼎新之屬通判府事陳君采觀察推官汪君大有庀其事二月庚寅經始七月庚戌告成穹棟碩楹奐奕嚴敞視昔有加焉己未虔妥用幣衿佩雲會相與端拜而議曰吾邦自慶厯諸老淑艾後進乾淳大儒闡繹正學孝弟修於家而仁讓興德齒尚於鄉而風俗厚理義明於心而賢才盛善信充於己而事業顯成我者夫子也聖天子立教於上而夫子之道益尊賢師帥迪教于下而夫子之道益

章夫道者治之本其功與天地並世之言治者謂古道不可以御今先政刑後教化道寢微而俗滋薄獨我公眇覲天衷民彝之統紀急衆人之所緩可謂知本矣昔魯僖公能修泮宮威德所被至于海邦夫子刊其詩於頌而先儒傳春秋則曰學校為國之先務雖用民力不可廢也故不與新作南門槩書之策今公茲舉合詩春秋之義蓋有魯侯文武之德而本之寬儉用能扶道翼教作新數百年幾墜之緒盛德至善百世不忘也於是

郡博士沈君德初鄭君信甫請書成事于石應麟世家  
鄭幸得從先生長者後升堂而聞金石之音入宮而見  
宗廟之美惟遊於聖人之門難為言曷敢贊一辭竊惟  
聞之論語始之以君子終之以君子學者所以學為君  
子也凡我同志服膺聖訓陟降庭止昭格不違上以承  
天子之休德下以篤師帥之善教罔俾克廣德心專美  
魯之多士尚其懋哉公名某於潛人端平文忠公之仲  
子學問政事得於文獻之傳宅牧朞年治效彬彬可紀

特書其大者以詔無斁八月望日朝散郎祕閣同修撰  
知徽州軍州兼管內勸農營田事節制軍馬王其撰

慶元路重建儒學記

四明自唐為州始有夫子廟宋始建學規模豐敞棟宇  
穹崇庠聲序音冠于浙左英俊之域絃冕所興文獻蓋  
彬彬矣至元十有九年春學燬于融風教授潘夢柱黃  
裳吳宗彥歷載繕葺經始禮殿門廡齋舍寢以畧具講  
經有席養蒙有堂皆草創未就二十八年冬肅政廉訪



副使陳公祥下車謂博士諸生曰化民成俗勸學為先  
嘗聞疇昔輪奐之盛意不止是盍飭工掄材以復舊觀  
顧儀門卑隘弗稱從祀容服弗嚴越明年夏鼎新高閤  
賁飾貌像六旬而畢二堂亦告成又惟斯文與天地並  
必華棟岑樓式旆厥藏因重建尊經閣五楹里士忻然  
競助教授蘇君焱搏約學廩續其不給同知府事阮君  
麟翁提其綱庶工丕作民不知勞幕掾韓君居仁協畫  
展勤不愆于素秋九月閣成喋峨壯偉衿佩聳瞻咸曰

六經如日月陟降庭止惠我光明扶人文以迪化原繼  
使者之德且將以舊門及堂更立先賢祠正其錄序繚  
以垣墉制度於焉大備蘇君請識成事于石某老不能  
文惟諸侯之學載於禮詳矣在易臨之象曰君子以教  
思無窮澤上有地猶君子之近民也近民則禮達而教  
行建其牧立其監有師保之義凡以存天理淑人心而  
已矧是邦為詩書之鄉逸民之黃純孝之董文士之任  
自漢以來為美談慶厯諸老模範後進淳熙大儒闡明

正學惟聖賢是式惟德性是尊少為洒掃應對大而格  
物致知如耳濡目染充然有得每孟春衣冠濟濟齒位  
秩秩司徒之教倫黨正之禮飲流風遺俗猶存未墜南  
豐曾公忠肅陳公繼為守貳表率薰陶東諸侯莫逮焉  
春秋大復古學之復道之泰也夫不農不仕何以謂之  
士非老非釋何以謂之儒行已有恥尚志仁義士之實  
也為君子儒夙夜彊學以待問儒之實也遊于斯肄於  
斯蓋亦踐其實副其名乎郡國有學昉于漢二千石所

察惟曰好文學敬長上肅政教順鄉曲三代考行之意  
藹如也升堂聞金石之音入墻見宗廟之美有作新之  
機而日新其德業孝弟忠信為根本明誠敬義為準的  
始於離經辨志成於知類通達用仰承菁莪樂育之仁  
不在茲時歟昔魯僖公能修泮宮教澤浹于海邦其俗  
秉周禮守經學一變至道聖人稱之誰謂魯遠道無古  
今師友淵源緒接洙泗頌其詩尚論古之人罔俾克廣  
德心專美魯之多士凡我同志懋敬哉歐陽子有言善

教者以不倦之意須遲久之功禮行俗純然後為學之  
成迺紀其始成以詔永久俾無怠冬十月乙亥前進士  
王某記

慈湖書院記

古者鄉有庠黨有序閭有塾里居有父師少師之教是  
以道德一而理義明書院之設意猶近古睢陽白鹿為  
稱首若周程朱呂治教之地文獻尤盛天典民彝之統  
紀賴以不墜東海之濱有太傅曰慈湖先生文元楊公

立心以誠明篤敬為主立言以孝弟忠信為本躬行實  
踐仁熟道凝清風肅然聞者興起可謂百世之師矣遺  
老見而知之後進聞而知之春木之苞兮其人若存兮  
此書院之所為作也古涪文公及翁紹其事不幸陷於  
浮屠氏鞠為荒榛幸天不拯斯文繡衣使者侍其公行  
部喟然歎息選一鄉宿望曹君漢炎為山長乃唱率善  
士同心協力舍舊而新是圖相視先生舊宅熙光故  
址爰契我龜鳩材庀工經之營之禮殿崇崇祠宇奕奕

敷經之席肄業之舍規模視昔不愆于素僦僦衿佩游  
於斯習於斯如升闕里之堂聞金石絲竹之音莫不油  
然而樂躍如而悟咸曰自堂徂基輪奐新矣陟降庭止  
惠我光明盍亦勉新德而進新知於是曹君暨賓錄長  
諭屬某著石章以永教思于无窮某耄且病辭弗獲敢  
誦父師所聞切磋究之嘗謂儒以道得民師以賢得民  
師言賢不言道身即道也萬古一道萬化一心仁人心  
也人者天地之心也天有四時風雨霜露地載神氣風

霆流形无一物而非仁則清明虛靜天地萬物為一體  
在易為不遠復在書為精一在詩為无貳在大學為毋  
自欺在中庸為至誠篤恭惟先生无意而自得之齋莊  
儼恪非禮不動言性必曰堯舜論治必曰三代道學之  
將廢也則正色謹言不囿于羣枉道學之復行則見幾  
卷懷不汨於勢榮耄期稱道若武公之作懿戒名滿天  
下若君實之在西洛本心明而外物輕行藏語默參諸  
百聖無不合於大易見先生潔靜精微焉於廣居賦見



先生廣大高明焉於過庭訓之言學見先生自強不息  
焉於講堂訓之言孝見先生一貫之道焉先生之文章  
皆性與天道之形著俯川流而仰高山即心之精神昭  
乎江漢秋陽之皜皜也居先生之居學先生之學則何  
以哉由事親從兄而盡性至命由洒掃應對而精義入  
神由內省不疚而極無聲無臭之妙下學上達不求人  
知而求天知庶幾識其大者而無一言一行之有愧可  
以欺其鄉不可以欺其家可以欺其家不可以欺其心

無體之禮此心之敬無聲之樂此心之和訓詁章句云  
乎哉先生之學文安先生之學也文安講論語於白鹿  
先辨其志聽者竦然動心收其放而存其良者在此朱  
文公亦云陸子所言專於尊德性學者多持守可觀又  
謂先生之學有為己之功合而觀之知入德之門矣有  
能約之以省察克治深之以薰陶涵濡問津於辨志尋  
源於尊德性以達聖人之海春融氷釋默契道體去先  
生之世若此其未遠也得心學之傳必有人焉濟濟多

士克廣德心凡我同志懋敬哉

廣平書院記

乾道淳熙間正學大明朱子在建張子在建呂子在建  
陸子在撫學者宗之如日月江漢光潤所被皆為名儒  
於是明有四先生其一曰廣平先生文靖舒公先生之  
學講于張而成于陸考德問業於朱呂心融神會精知  
力踐其躬行有尚絅之實其誨人有時雨之澤沈楊素  
三先生道同志合化東海之濱為洙泗位不配德而教

行於鄉聲聞於天下淳祐中貢以易名先生有孫泌明  
經世其學與計偕上春官屢不偶日始對策集英典教  
象山縣庠德祐初元請于郡太守謂年七十有一願挂  
衣冠歸老故里留寘閭幕不就退而紬楹書啟迪後昆  
惟昔先生嘗題戶丹曰廣平書塾游於斯講於斯羣叟  
聚辯於斯先生沒門人敬事不怠肖象祠于塾迺適追  
先志與飾堂序帥子若孫暨宗族之秀朝夕講業春秋  
釋菜先聖歲時朔望謁祠齒拜講說冠屨翼如誦弦藹

如某聞而歎曰古道庶幾復興乎古者士有常心家無殊俗八歲入小學十年就外傳二十五家為問問有左右塾里中之老有道德者為左右師坐兩塾洒掃應對是謹詩書禮學是習孝弟忠信是修蒙養豫教薰陶涵濡是以人有士君子之行士之子常為士漢唐之盛流風猶存經生守家法世族重宗譜子弟彬彬多賢然金籊之諺城南之勸識者謂誘以利祿非天爵之貴惟我國朝師道之立上接鄒魯冢宰所降之德司徒所教之

倫父兄訓詔必是焉先其修於家者若睢陽戚氏子孫  
世德之久南豐曾氏稱之若墨莊劉氏自太宗時至中  
興忠厚雖睦之風不墜朱子纂次其家傳概舉一二言  
之可為士效法今文靖之孫亦服祖訓不違若稽家有  
塾之誼紹衣德言弗佚前人光用淑艾于家庭我有喬  
木殖德培之我有嘉苗種學楙之詵詵胄子在斯塾也  
于墻于羹如見先哲昏定晨省入孝出恭無非教受業  
講貫習復計過無非學張子序孟子說曰為己者無所

為而然也陸子講魯論義利之章曰學者當辨其志是  
訓是行服膺勿失由二先生之言得文靖之心百年如  
一日也國人稱曰文靖之後世世有人焉豈惟一家之  
光一國仁讓將自一家始詩曰有斐君子終不可諼兮  
又曰維其有章矣是以有慶矣文靖有焉子子孫孫勿  
替引之後之人其懋哉遂書以為記是歲乙亥夏四月  
初吉勤後學王某記

先賢祠堂記

古之有道德者教于鄉里謂之鄉先生在鄉而祠于學猶在國之祭于瞽宗也詩曰有斐君子終不可諼兮大學以為盛德至善民之不能忘也秉彜好德之良心千載一日況其邇者乎明自唐為州文風寥寥宋慶厯中始詔州縣立學山林特起之士卓然為一鄉師表或授業鄉校或講道閭塾本之以孝弟忠信維之以禮義廉恥守古訓而不鑿修天爵而無競養成英才純明篤厚父兄師友詔教琢磨百年文獻益盛以大三先生之功



也淳熙大儒疏濶渥之源而達之洙泗是邦諸老之學  
始得江西之傳而考德問業于朱呂張子之門以尊德  
性求放心為根本以顏曾四勿三省為準的闡繹經訓  
躬行踐履致嚴於進退行藏之際致察於善利理欲之  
幾明誠篤恭俯仰無所愧怍學者知操存持養以入聖  
賢之域四先生之功也前後九賢教行於一時澤被於  
百世郡學有祠舊矣因鬱攸而廢至元甲午冬十一月  
洛陽狄公桂持廉問之節行部至明既即庠序見諸生

思所以啟迪斯文俾多士知所矜式有言墜典之未舉  
公喟然曰茲立教善俗之原其可緩乃屬郡博士戴君  
友復舊誌祀十二月丙子朔公率守貳僚寮是安是奉  
以風厲士子丕遠耆老成人宅心知訓庶幾紹聞衣德  
言人有士君子之行矜佩踈瞻莫不訢訢曰善教得民  
心明使君有焉是祠之復其作新士習之機歟覺有先  
後道無古今高山仰止景行行止匪徒慕之亦允蹈之  
將有聞風興起者惟昔沛三輔有耆舊節士序魯廬江

有名德先賢贊某采撫舊聞述為小傳事有據依辭無  
溢美用諗鄉之善士尚式時先哲之猷訓無斁是月壬  
午後學王某記

奉化社稷壇記

奉化社稷壇舊在縣南令秦辨之徙置西南二百步其  
後圯而復修迨今百三十餘年垓墻弗飭鞠為荆榛邑  
劇事繁自錢穀獄訟外謂之不急舊儀空存嘉氣湮鬱  
旱澇札瘥民罔克乂至元廿六年冬襄賁丁侯濟為尹

寅念民人社稷之寄自古適重敢不祇肅稽經訊禮規  
制一新社東稷西崇廣如式風雨雷師鼎列其次立石  
有巖植木有儀奠瘞之位齋祓之廬烝祀恪虔勿替敬  
典明年正月告成迺率寮案潔牲醴為民迓續豐年之  
貺雨暘時若穡人成功咸曰耿耿社哉於是耆老畯民  
屬應麟為記以識其耄矣無能然俎豆之事嘗聞之竊  
惟祀典行乎郡縣惟先聖先師暨社稷達天下亘萬世  
是尊是奉實為政教之本古循吏之先務而俗以為緩

夫天生時地生財莫大乎土穀而有神司之后土后稷  
以妥以侑明斯禮以治國其如示諸掌乎風散雨潤箕  
畢生焉周官之所禋燎也鼓以雷霆庶物生焉唐禮之  
所以同壇也是皆天道之至教神氣之流形春秋祈報  
曰民力之晉存三時之不害亦惟德馨香祀清心正躬  
對越無愧吉圭荐信洋洋如在儲休錫羨燕及黎庶非  
知禮之原其能急流俗之所緩歟蓋庸敬在心斯須之  
敬在祭本乎地者親下幽則有神令於民最親政有否

臧神異如響神之格思誠不可掩昔者古靈陳公宰百里每過社稷孔子廟必下而趨化行習嫗興于禮義今丁侯治邑三年師法前猷庠聲序音弦誦詩書以淑艾我士女又能務農重穀敬恭明神政教兼善藹然學道之遺風可書也已乃書以遺邑人俾刻諸麗牲之石用詔無怠

德潤齋記

史景純獨善先生之孫也謂某曰范卿之幼也大父命

名曰潤以德潤為小字衣言服訓不敢忘迺以德潤扁讀書之室朝夕瞻省適追祖武念德不忘庶無墜教成之意願予為之記余謂獨善先生名其孫益取諸大學詔燕後昆眎范喬之硯魏謩之笏未若斯言之寶也誠意之義先儒闡繹既詳曷敢贊一辭昔嘗讀易大傳至於三陳九卦首以德言之此涉難處變之法聖人所以牖後覺也九卦之中履以澤為德之基井以水為德之地基者德之積地者德之厚惟其積則吾身之涵養為

淵泉之溥惟其厚則吾身之和順為時雨之化世故縕  
紛人以我為子綦之槁木吾方浩浩乎無悶末俗混濁  
人以我為壺丘之波流吾獨皦皦乎自潔道腴可味不  
以脂膏自潤仁宅可居不以富貴為潤得時則澤潤生  
民卷懷則玉在山而木潤孰非是德之流行夫河潤九  
里漸洳三百步溝澮之盈其涸可立待有本之與無源  
也閱之於安潛之於侃身雖否而常華之是似或之於  
淑超之於鑒身雖泰而析薪之弗荷由今觀之孰榮孰



枯景純永惟承家之重嗣守之艱兢兢乎奉槃水而執圭璧于羹于牆儼若著存步繩規矩率乃祖攸行豈惟一身之潤而百世之澤有行勿替詩曰有斐君子終不可諼兮大學所謂盛德至善將於獨善之門見之顧名思義景純其懋哉

序 跋

天禧編御集序

詞科第三  
塲首題

宋受命於穆清五緯集奎觀人文化天下維三葉重光

真宗章聖皇帝濬哲欽明體堯蹈舜游意藝苑積思書

林睿藻天葩轆轤元化慶霄在上萬物五色宜刺玉版

藏金匱垂訓悠遠以三二典七六經天禧之元月旅黃

鍾日躔庚子臣虛已哀次御集百二十卷爰即禁庭俯

示丞弼明年孟春嚴儲于繼文殿四年季夏甲午列局

崇文分命注釋仲冬庚申出聖製七百二十二卷畀輔

臣五年季春庚子欽奉御集尊閣天章定著為三百卷

仲秋庚午藏之名山以副墨盼焉赫乎盛哉集有序篇

實出御製五年正月癸卯偕聖政記序召邇列觀之臣  
竦臯翰墨衣被昭回之光稽首書下方曰帝王之文即  
天地自然之文仰而觀則七政三辰之炳耀俯而察則  
山川卉木之彪列帝堯煥有文章文王經緯天地繇此  
其選道心淵粹發為英華聖學精微寫為謨訓豈有意  
于文哉若昔黃帝丹書及銘傳至周漢聖文裒集其昉  
此乎高文有傳著在七畧武帝有集始折二卷貞觀開  
元成集並垂理媿於辭駁亡以議惟我藝祖紹天覺民

贊述孔顏道統復續太宗繼序緝熙光明皇文拔天簫  
勺宇宙臣文仲編為三十卷臣彭年編為二百十四卷  
燕謀詒翼用敷遺于章聖厥既北轡輦允西縻靈夏幅  
員清謐威械戢藏升中岱宗展采汾陰禮葉樂華歲蕤  
蔥蒨帝益思持盈制治啟迪化原乃增講員乃御延閣  
左右圖籍銘經鑄辭綠字瓊章壁明奎粲歌有念農閔  
兵奉先為政豐年觀麥喜雨瑞雪之屬斯元首薰風之  
雅詠也論有勤政崇儒祥瑞解疑思政歌罷為君難寬

財利之屬斯畫卦重文之邃學也龍閣有贊聖文有頌  
元龜有序泰山有銘庇民有述修河有碑三記五箴之  
作清景百篇之製經史徧詠明良載賡肆筆而成憂切  
韶濩帝心謙輦未議彙輯祥符四禩九月丙子臣敏中  
請錄宸章叢藏渠觀而文頌歌詩十五卷上于五年四  
月癸卯號登天禧遂金聲玉振而集大成臣竊從太史  
氏欽覲集目凡頌碑銘贊之卷二十六詩歌辭章樂府  
之卷一百十四論述序箴條記文書其卷四十正說承

華要略靜居玉宸法音集其卷四十有五春秋要言五  
卷臚分試題表詞卷別七十芸籤鈿軸數盈三百視滋  
福殿所觀為益備雲漢之章風行水上之文作者不可  
及已鴻生鉅學屬辭摘藻有三代風非金玉追琢之功  
鳶飛魚躍之化歟抑臣管闕國史祥符丙辰之春開資  
善訓元良箴記歌吟日賚月錫天禧四禩仲冬甲戌臣  
殊編摹賜東宮御製成五十卷育蒙泉之德培豐水之  
仁帝範金鏡訓戒等書方斯蒞矣文子文孫監先憲酌

祖道至于萬年永保民罔不自斯文始臣謹表而出之  
乾興初元八年辛亥以是集錫該輔併識于篇以鋪揚  
我宋重規疊矩之盛美臣謹序

詩考語畧序

漢言詩者四家師異指殊賈逵撰齊魯韓與毛氏異同  
梁崔靈恩采三家本為集註今唯毛傳鄭箋孤行韓僅  
存外傳而齊魯詩亡久矣諸儒說詩一以毛鄭為宗未  
有參考三家者獨朱文公集傳閎意眇指卓然千載之

上言關雎則取匡衡柏舟婦人之詩則取劉向笙詩有聲無辭則取儀禮上天甚神則取戰國策何以恤我則取左氏傳抑戒自儆昊天有成命道成王之德則取國語陟降庭止則取漢書注賓之初筵飲酒悔過則取韓詩序不可休思是用不就彼岵者岐皆從韓詩禹敷下土方又証諸楚辭一洗末師專己守殘之陋學者諷詠涵濡而自得之躍如也文公語門人文選註多韓詩章句嘗欲寫出應麟竊觀傳記所述三家緒言尚多有之



罔羅遺軼傳以說文爾雅諸書萃為一編以扶微學廣異義亦文公之意云爾讀集傳者或有考于斯

跋袁潔齋答舒和仲書

右潔齋袁先生答廣平舒先生和仲書掇其要切者如昔子朱子有言子思教人之法以尊德性道問學兩事為用力之要陸子靜所言專是尊德性潔齋先生之學陸子之學也觀其尺牘皆勉學之要言蓋尊德性實根本于學問未嘗失于一偏是亦朱子之意也所謂但慕

高遠不覽古今務為高論不在書策者歲末俗之膏肓  
至深至切所謂古人多識前言往行日課一經一史斯  
言也學者當書紳銘几畫誦夜思尊所聞行所知可不  
勉歟至于因晚楊梅之餽推之于大才晚成此格物之  
學一草一木之理必致其極節或虧于晚學或倦于耄  
倪焉孳孳不知年數之不足尤當以是自儆書不云乎  
汝丕惟商考成人宅心知訓嗟爾後進惟憲法是式沉  
潛乎經術貫穿乎史籍外以致用內以崇德費隱一原

敬義俱立應正學之不墜尚前修之可及王應麟識

四明文獻集卷一

欽定四庫全書薈要卷一萬五千九百九十三

集部

四明文獻集卷二

宋 王應麟 撰

赦文 詔

咸淳三年郊祀大禮赦文首詞

內制正  
月一日

門下朕嗣受丕基適求彞憲正月上日類于帝率惟虞  
帝之初昊天成命單厥心祇若周郊之始永懷先烈敷  
遺沖人既付中國民慨救寧之匪易無疆大厯服凜持

守之惟艱顧菲薄懼弗克勝而兢業未知攸濟三陟庶  
定益思戒備於不虞八蜡雖通猶慮豐穰之難必無日  
不惕賴天之靈并絡奏勲寢恢復舊宇臘雪呈瑞實兆有  
年汔可小康敢曰能饗載稽隆興之詔仰法至道之規  
維泰畤之肇禋於孟春之朔旦以大報本式教用休然  
念黍稷非馨必至治而神明感牲醴以告必嘉德而民  
力存其悲忱辭惟予實意蓋嘗崇節約之制廣振貸之  
仁屏遠儉壬申儆貪墨凡立政立事灼知厥若庶在宮

在廟不顯亦臨敷前人之大功乃建鴻號秩元祀之將  
禮乃涓熙壇相維辟公初見宗祖恭館奉幣長發其祥  
太室裸圭遙追來孝儼一純而對越輯衆正以佅從備  
巾車五路之容肅甘泉萬騎之衛鳴玉鸞於蒼龍之駕  
叶銅律于青陽之歌有本有文盡物盡志霽景格時暘  
之應慶霄宣華旦之輝迪惟寅畏之忱用答縕紛之貺  
於是被袞而薦鬯昇丘而欽柴合祛兩儀協乾坤之交  
泰陟配二后昭功德之兼隆賓八鄉于桂尊穆東皇于

瑶席神鶚吉而高旂澹星彪列而煩幄光燕祉皇天馮  
馮翼翼介壽文母怡怡愉愉迄用有成俾爾單厚飭躬  
奉祀以蒙嘉氣敢專饗於蕃釐行慶施惠以及兆民盍  
丕承於鴻造予其大賚咸與惟新可大赦天下

尾詞

於戲相上帝寵綏四方惟始和而觀治象建皇極敷錫  
五福惟好生以洽民心蓋春者德之元而祭者澤之大  
尚賴股肱爪牙之勵翼岳牧侯衛之布宣永敷萬國之



歡勿替億年之敬

德祐元年明堂大禮赦文首詞

九月十四日

門下朕嗣大厯服迪前人光皇天既付中國民敬事之心敢怠明堂以教諸侯孝肆祀之禮有常惟懷永圖未堪多難菲德弗類上以累三光之明柄任匪人下以稔外侮之患鴻雁哀矜而靡集蛇豕薦食以無厭並告神祇以與爾衆請命有指疆土肆予沖人思艱恃太母保右之慈去累歲凶邪之蠹更化而行善政籲俊以彊本

朝黎元之心寢安將士之氣復振往來攸濟曷惠其寧  
祈永命惟在德元敬神明宜無悔怒念天地好生之初  
意畀矜萬邦而祖宗不殺之至仁垂裕億載有嚴大饗  
其悲忱辭惟紹興尚質從權寅弭兵之祝惟淳熙齊  
精歲事率循越紼之規茲牧寧圖於武功乃儀式刑于  
文典聿懷在疚之戚矧當孔棘之秋肇禋維清大禮必  
簡屏黼綉周張之飾優霜露淒愴之思命輔臣而款真  
宮咨宗屬而裸太室心感通於三方之輿躬陟格於九

几之筵報本合祛尊祖並侑圭幣始薦屬屬然如弗勝  
蕭脂載燔洋洋乎如在上牲醴之馨則無讒慝粢盛之  
潔則曰豐穰秩祐申錫無疆並貺惟予有慕月明星睂  
用格熙成乾清坤夷庶克耆定歸胙介怡愉之寄肆青  
布寬大之條聰明自民益上帝臨下有赫恭默思道謂  
百姓有過在予閔征戍之勤勞惻邊陲之荼毒汔可小  
息咸與惟新俾沛膏澤而鏡至清用開治原而導和氣  
可大赦天下

尾詞

於戲皇極敷言于帝其訓敢專五福之膺我將既饗畏  
天之威永保四方之人尚賴股肱咸一德之輔熊羆不  
二心之臣合謀計安攘狄復境協成順信之助丕集昇  
平之勲自似道喪師國事危急將士離心兵出屢衄朝廷方自理明堂科舉等事至于束手無措乃議納土求封為小國齋降表使燕京哀哉

舉廉吏詔

詞科

勅門下周聽治以六計廉善居先漢辟士以四科清白

為首朕灼知有俊誕保受民惟前代迪厥官不肩好貨  
凡正人羞其行庶幾成風嘗賜札以律貪復作銘而申  
訓曾是在位猶從匪彛鞭撻不已而寵賂章簠簋不飭  
而節行缺退食鮮羔羊之操虐民多碩鼠之譏念激濁  
在於揚清而瘳惡莫如彰善神爵獎朱邑之潔治盛循  
良開元旌王丘之廉風移苛矯一賢蒙擢百辟鄉方肆  
公道之天開閔顏波之瀾倒克正罔敢弗正既昭德以  
塞違進良以率不良與厲精而更始咨爾承休之彥體

予美俗之懷廉欲得其真公選潔修之士舉皆賢於已  
博詢操履之原內則如光祿之薦王嘉外則如河東之  
察黃霸人之有猷有守具以實言予其懋賞懋官亦克

用勸故茲詔示想宜知悉

按詞學指南云周官御史掌贊書注云若今尚書作詔文

秦改令為詔漢下書有四三曰詔書其文曰告某官四  
曰戒勅其文曰有詔勅某官唐貞觀末張昌齡召見試  
息兵詔此試詔之始也其後學士試批答皇朝西掖初  
除試詔紹聖試格止曰戒諭如近體誠諭風俗或百官  
之類紹興  
改為詔

# 舉將帥詔

勅門下朕盭徹桑未雨之戒軫采薇治外之憂熊羆入  
王家昔何多於英傑蛇豕食上國今未救於彊陞風寒  
僅數處以護吳道敝欲多方而誤楚荆益慮深於唇齒  
湘廣備缺於腹心雖錫斧鉞而啓元戎猶聽鼓鼙而思  
猛士食靡忘於鉅鹿志孰奮於伊吾內無舉奉世之臣  
外乏代崇文之將朕為拊髀戎將生心昔高廟歲舉六  
科智勇是選孝祖薦格五等謀略為先率由舊章深詔  
執事詩書如卻縠豫思元帥之儲策慮若陳湯勿求循

行之備搜異能于藪澤拔奇節於偏裨爪牙官備不虞汔成固圉之績履屐間得其任无媿知人之明惟爾之能

求朕攸濟故茲詔示想宜知悉

東萊先生曰詔書或用散文或用四六皆得惟

四六者下語須渾全不可如表求新奇之對而失大體但觀前人之詔自可見西山先生曰王言之體當以

書之詔誓命為祖而參以兩漢詔冊辭氣藹然深厚爾雅可為代言之法

又曰兩漢詔令朱文公曰三代

訓詁誓命皆根源學問敷陳義理

### 科舉詔

勅門下國家用儒之效與三代比隆朕紹休聖緒于今



四年粵若恭默之時亦既選士未遑親策茲將進于庭而問焉仰惟仁祖臨軒之初太史奏雲瑞名臣輩出施之事業碩大光明朕甚慕之先帝道久仁洽凡今宗工獻臣莫非豐芑涵濡之澤燕詒我後顧惟天下之才無窮而取之亦有無窮之用思昔敷納以言明試以功興賢興能出長入治所取皆有用之實爰自以文設科視古寔異然經術詞章所以覘濟時之蘊徒文乎哉學問粹而器識宏其文渾厚雅正實用於是乎見朕既臨雍

表章儒先首善崇化以風四方矧景運維新協乎五緯  
聚奎之歲爾多士其必躍然興起矣蓋飭操履以培其  
本明理義以浚其原勿事穿鑿勿尚浮靡以稱作人之  
實意羣有司尚亦公爾攷擇明爾鑒裁俾抱負器能之  
士惟朕時舉庶得賢立太平之業式克迪前人光其率  
朕志無斁

日食求言詔

勅門下惟天降割我家嗣君幼冲未堪多難吾以衰老

勉同聽政明不能察姦臣之誤國仁不能捄寇敵之憑  
陵德澤弗流政令多失乖氣致異適見于今迺季夏月  
朔日有食之既陽微晝晦變莫大焉吾惟艱危之會憂  
心如熏重以災異譴告于何不臧厥咎在吾痛自刻責  
貶損尊號猶恐未盡應天之實方與嗣君夙夜祇懼省  
躬悔過慨念姦臣顓政之久杜塞言路蒙蔽天變下情  
壅于上聞禍至此極今吾大警悟大懲艾虛心以改惟  
人言所以達天意咨爾百僚士庶盡忠極言凡涼菲之

愆政事之疵黎元之疾苦爰暨攘夷固圉之長策可以  
銷惡運導和氣者毋有隱諱將采擇施行人心悅而天  
怒解庶其在此布告中外體吾至意

資政殿學士江萬里上表再辭免同知樞密院  
事不允斷來章批答

省表具知朕惟文事必有武備聖人經綸之學易為之  
原于萃曰戒不虞於既濟曰思患豫防以幾深之略圖  
久大之規卿素學也在我烈考未究遠猷用敷遺于沖

人登貳宥密庶幾本彊而精神折衝厥有嘉言以教告  
朕曰戎情之往來叵測邊備之科瑣當嚴乃言惟服尚  
式萃既濟之訓協謀籌幄日申倣以討軍實時閒暇以  
明政刑率惟牧功昭乃辟之有人亦有無窮之聞懋哉  
欽予時命所辭宜不允仍斷來章

萬里臨事不能無言  
似道惡之似道以去

要君帝涕泗拜留之萬里以身掖帝云自古無此君臣  
禮陛下不可拜似道不可復言去似道舉笏謝曰微公  
似道幾為千古罪人然益忌之帝嘗問經史疑義及  
古人姓名似道不能對萬里從旁代對帝語王夫人以  
為賢後力請援襄樊不報遂力求去出知  
福州年七十三矣大兵入饒州赴水死

賜文天祥辭免依舊權工部尚書都督府叅贊  
軍事江西安撫使除淞西江東制置使知平江  
不允詔

勅天祥省所奏具悉朕未堪多難疆圉孔棘御事罔不  
曰艱大天祐我成功所惟時魁儒秉忠倡義獎率三軍  
入衛社稷國勢為之增重人心恃以為安精神折衝文  
武是憲若稽高廟命臣願浩開制閫于江淞宏濟中興  
之業者定武功卿器度才猷克邁前哲惟長江之險要

未復畿甸之備守當嚴命卿以太常伯兼領二使表裏  
撐拓以固吾圉東西運掉以靖敵氛儒帥一臨士氣百  
倍用保入我文祖受命民茲惟豐芑詒謀之意亟其禡  
牙紓朕宵旰之憂所辭宜不允

天祥寶祐四年進士第一  
初帝御集英殿策士

召公覆考考第既上帝欲易第七卷實其首公讀之乃  
頓首曰是卷古誼若龜鑑忠肝如鐵石臣敢為得士賀  
遂以第七卷為首選唱名乃天祥也自宋有國上親策  
者三人太祖朝張齊賢高宗朝張九成理宗朝天祥  
此所謂魁  
儒者是也

賜顯謨閣直學士兩淮安撫制置使知揚州李

庭芝築城獎諭詔

勅庭芝朕通駿先猷儀圖外治程伯之率淮浦既立武  
以修戎山甫之城東方爰任賢而賦政眷言揚土之屏  
翰粵若相臣之旬宣無競維人屹金湯而鼎立有截其  
所萃壁壘以星聯相攸西北之隅裒時形勢之要允懷  
勝筭孰替膚公卿儒雅折衝謀謨經遠增二萬列屯之  
備懋七年善政之勤未雨而綢繆無日不申倣謂分營  
於箕翼必設險於帶襟如山之苞控仁愿三城之會因



地之利倣仲淹大順之規實墉實壑而幹方迺疆迺理  
而築室不愆于素俾來以圖召伯有成王心則寧載嘉  
爾績魯侯之功海邦是若永入我民故茲獎諭

賜呂文德收復開州江面肅清獎諭詔

咸淳三年十一月十一日

月十一日

勅文德朕懋采薇治外之勤謹徹桑未雨之備日申倣  
軍實無競維人天災我成功所助者順狡焉彼寇竊據  
開城哀克鞠頑弗顧佛狸之識折衝厭難靡忘鉅鹿之

思卿策慮適于神明忠忱衛于社稷奮鷹揚之勇卯詔  
辰行率虎闕之師風驅霆擊我環攻而氣倍彼株困而  
技窮旃裘之援莫前金湯之險逆復膚公甚雋勝勢用  
張巴夔西土之喉衿既克敕定襄峽上流之唇齒猶肆  
窺覷恃吾有以待之惟卿獨能平爾以身督戰先事候  
情百將一心凡履屐間當任四牡三捷從枕席上過師  
運奇伐謀并力逐北俾投鞭之衆遠遁而阻隘之羣一  
空汔奏肅清之勲深嘉扞禦之略荊州通蜀而用武朕

方觀諸葛之規模江許出軍而告成卿尚圖召虎之事  
業益恢疆宇丕耀旂常故茲獎諭

賜淮西制置大使夏貴獎諭詔

勅夏貴朕惟盛夏逾半分陰易流諸路勤王兵已集望  
卿獎三軍以清江面惟長淮以西倚卿為金城守廬復  
築通江北之咽喉屢戰屢捷北敵膽寒進師濡和則建  
業當塗有克復之期奏六月之膚公報先帝之殊遇在  
此行也卿謂水陸並進隨機用事知勇明決允契朕心

亟其合熊羆之士清江介之氛獻歆清廟飲至京師宗社生民之福豈惟予一人以寧故茲獎諭

賜淮東制置大使李庭芝獎諭詔

七月二十八日

勅庭芝惟天付予有家冲眇未堪多難北敵憑陵覃及畿甸維揚截然中居若防制水恃以無恐實惟禮樂詩書之帥秉忠藩翰王略且戰且守屢奏膚公邇者舟師不利江氛未清根本之謀我是用急趣卿入衛彊本折衝庶幾籌幄可以決勝奏章來諭表撐裏拓之慮甚密

申儆軍實招選勁兵將有造闕之期朕維寵嘉之已命  
夏貴旬宣兩淮鄉候貴開閫亟率將士星馳來朝國人  
望鄉如望歲焉商飈已肅分陰當惜戒我戎旅不留不  
處罔俾常武之功專美有周故茲獎諭

賜知夔州張起巖獎諭詔

八月二十日

勅起巖朕惟聖人有金城所恃者節義之士惟德不明  
姦臣誤國分閫守圉之臣接踵畔降長江失險延及上  
流每歎國家三百餘年仁厚涵育豈惟一顏平原者自

荆峽不守蜀道未通將士勤備禦而不得撫勞黎元苦  
兵革而不得拯救乃睠西顧宵旰弗遑寧湖南帥臣芾  
以卿所奏帛書來上知卿忠忱義槩堅守夔門誓與軍  
民赤心圖報中流砥柱疾風勁草于卿見之方以久不  
聞蜀事為急卿獨間關險阻馳奏於危急之衝有臣如  
此國勢增重彼負國賣降者真可愧死卿又糾率義旅  
尅復開州斬使焚書誓以滅賊為期朕嘉歎不已趣命  
授卿正任承宣使領廂部之師以示褒賞天助者順師

出有名強寇逆天平殄有日朕已去姦進賢改紀其政  
中外人心踴躍思奮卿其獎率軍民益嚴戰守如昔璘  
玠之保蜀敵愾獻功朕於節鉞無所吝卿之忠義旂常  
竹帛有光焉故茲獎諭

賜李庭芝獎諭詔

勅庭芝朕未堪多難敵人率我蝨賊以來蕩搖我邊疆  
狡焉窺淮之謀將塞餽餉之塗卿以股肱之良任方面  
之重激昂將士指授方略維時熊羆不二心之臣合謀

同力人百其勇誓必剪滅此而朝食師直為壯天助者  
順大捷于灣頭再捷于淮安三捷于寶應執訊獲醜來  
奏膚公威稜赫張可以舒華夏之氣警旃裘之膽卿為  
東陲金城修扞于艱以集雋功朕甚寵嘉之乘戰勝之  
威掃妖壘而空之則卿之勲業暨諸將功名昭垂竹帛  
於常武淮浦之詩有光其益勵忠臣義士堅守於內力  
戰于外糾合精銳霆擊風驅壹大治之使匹馬隻輪無  
遺者用成埽敵復境之不績朕所望于詩書之帥也戰



多之賞已眎功行之指期肅清高爵秩無所吝比爾將士咸體朕意故茲獎諭

責諭賈似道歸里終喪詔

德祐元年五月四日

勅似道吾聞忠孝臣子之大節命義天下之大戒卿受國家之殊遇居將相之重任邇者督師弗績威國債軍人言沸騰欲正其罰吾與嗣君念卿服勞王朝務存體貌俾歸里終喪用彰孝治吾於待元臣之禮至矣聞卿安處維揚未即就道公議空涌皆謂臧孫紇如防春秋

大義凜如霜日君令臣從焉可違也吾惟卿素以忠孝

自負必不固違吾命以虧事君事親之道凡羣臣所奏

姑惟置之今歸途未阻可以退修初服盡禮倚廬而猶

復翱翔淮壖忠孝胥失進退無據大臣出處當如是乎

茲命李庭芝宣吾與嗣君忠厚之意卿其亟歸喪次以

盡臣子之道以弭公議之責固當曲示保全否則衆論

益甚名教靡容吾雖欲屈法伸恩而不可得卿尚明聽

吾言善始以終亦有辭于永世故茲詔示

時似道罷平章都督予祠

上表自劾太后有旨令李庭芝津遣歸里終喪留維揚  
不行王鎰奏似道既不成忠又不死孝降詔以責云云  
六月似道歸紹興閉城不納羣臣交章論誤國喪師之  
罪連貶竄遣鄭虎臣監押之廣南至漳州木綿庵即廁  
上拉其  
冒殺之

勉諭江西制置大使黃萬石置司隆興府詔

七月

五日

勅萬石昔晉庾翼移鎮樂鄉王衍謂江渚有虞不相接  
救方岳重將當居要害之地為內外形勢言兵者避之  
今天塹失險深入堂奧南昌為江西一都會襟帶中流

高廟命李綱為大使鎮是邦此中興宏規也卿志慮忠實才猷開濟屬大事當一面吾以綱之任命卿精神折衝人心恃以不恐聞卿駐兵臨川氣勢猶未翕合商飈已動分陰當惜戰守之計不容緩卿其趣提師旅開閭南昌與守臣協圖備禦乘機合謀必以克復江地肅清氛祲為期詩曰戎車既駕四牡業業豈敢定居一月三捷卿其懋哉故茲勉諭

賜利西路安撫副使兼知涪州陽立詔

六月二十日

勅陽立敵為不道偷渡長江似道督師不戰而潰誤  
國殄民以至金陵京口皆失守妖氛延及近甸冀四方  
忠臣義士來救國難以拯民命賴天之靈輔臣協圖屏  
黜似道蠲除蠹國害民之政人心頓回盡力戰守叛將  
凶酋相繼殄滅然後宗社僅安京師稍定天未悔禍江  
陵之事又駭吾聽蓋郵傳阻隔未知似道已黜是以人  
無固志惟卿智略輻湊忠氣慷慨秉忠仗義董率精銳  
進于三峽奮勇鏖戰立功甚偉吾與嗣君聞之嘉歎有

臣如此可以滅此朝食望卿之來以刻為歲昔楚申包胥求救于秦立依庭牆勺飲不入口沉卿膺閭寄之重必能投袂纓冠赴國家之急已擢卿正廉車之任其亟星馳露次救我艱危或湖北路梗盍取間道疾驅而來勤王奏功吾於高爵懋賞無所吝故茲詔示

賜四川制置副使兼知重慶府張珏詔

勅張珏吾擁祐嗣君未堪多難似道誤國潰師寇禍極矣國事急矣以卿忠忱壯槩著勲西蜀用授節鉞聯亞

保分蜀閬之寄今寇氛迫近其憂有重於蜀者已出六月之師趣諸將進討猶患氣勢未合如卿義勇奮發吾望卿來如望歲焉同室有鬪纓冠往救鄰國有難頓首

出師卿忠義感神明其忍立視國家之急乎其亟獎率三軍星馳電邁或湖北路梗即從間道入援詩曰王于

興師修我戈矛與子同仇吾所望於熊羆不二心之臣

也時珏知合州屢捷復瀘涪二州元兵以不和而潰趙定應乘間迎珏入城珏至遣將四出元兵屢敗伊蘇

復圍重慶克之珏死於難

賜咎萬壽詔

勅萬壽自敵馬飲江薦食近畿國勢岌岌秋風已動後  
憂方大卿忠義謀略名冠西州敵所畏者唯卿耳纓冠  
投袂以救國家之急此卿之志也吾與嗣君簡注已久  
屢頒手札久諭丞相馳書仍遣額使銜命趣召未知使  
者已達吾意否乎諸將雖已進師未有統帥天其或者  
待卿以成肅清恢復之功今再遣某官趣卿來卿忠忱  
體國必能提精兵率良將取間道鼓行而前星馳入衛



以殄滅北敵為期將士聞卿來朝壯氣百倍敵不足平也

時萬壽不至  
後以蜀降

賜左相陳宜中勉諭造闕詔

七月二十四日

勅宜中邊敵憑陵姦臣潰敗惟卿屹然為宗社之柱石  
討亂賊去凶邪收黎元之心作將士之氣國勢漸振皆  
卿之功彼何人斯挾私肆毀吾知此書詐也卿何嫌何  
疑翩然出關命使者趣卿歸造于朝而出晝不少留吾  
與嗣君朝夕俟望忘寢廢食卿忠義貫日月必惻然動

心矧秋風已動敵謀日深廟堂僅一右相科瑣邊吏唯  
卿明習守禦孰緩孰急將士孰勇孰怯指授處置之方  
略分陰不可緩卿為國計盍幡然而來或不念吾老幼  
之菑疾獨不念先帝之殊遇乎卿以安社稷自任當危  
急存亡之秋豈忍舍去亟入政事堂圖所以攘夷復境  
之策再命從臣勉諭尚體吾懇切之意

宜中與王爚不  
協會留夢炎自

江南入朝爚宜中皆請相夢炎而乞去爚即就民居以  
丞相府讓宜中宜中言一辭一受何以解天下之譏因  
辭去遣使遮留之後宜中以親辭  
太后自為書遺其母楊氏乃赴召

又

吾自丞相出關憂心如熏屢遣使再下手詔趣丞相造  
闕望卿如望歲而未有來朝之期諫臣抗疏謂丞相當  
姦臣僨師之後轉危為安勲在宗社指授處置諸將信  
服敵難孔棘此何時而可舍去覽之憮然維危急之秋  
一木支厦罔不曰艱大二相協力扶持度克有濟古社  
稷臣不輕於進退矧受任艱難之際不止身佩安危而  
已前日之去固知丞相之心有大不得已者吾既察姦

誣之蹟盍幡然而來都人之瞻徯至切將率之意嚮易

睽其亟回公府用圖戰守之計汜成美功

時宜中以母老辭歸永嘉

詔趣入覲國事已不可為矣巴延進兵高亭山請執政  
議事宜中夜遁乃以賈餘慶為右相吳堅為左相丙子  
廣王益王由海道趣温州蘇劉義陸秀夫來會宜中海  
船泊清澳門諸人往見之共議興復廣王登位宜中復  
相後奉二王入海如占城乞師遂不還按公所草賜  
詔自勉諭黃萬石以下數篇實足以興起人心然當紀  
網大壞之餘強藩大鎮惟思叛國以圖富貴其肯聽  
其辭命以赴危難乎此宗社之所以汜於絕滅也

勉諭王爚陳宜中詔

德祐元年五月二十日

遭家不造國步孔艱民自擇相我興授之如光公著皆

中外之人望所冀訐謨遠猷共濟艱難令人心寢回援  
兵漸集此二相協力經綸之功夏已逾半正當惜分陰  
以圖攘却時機易失敵謀難測吾朝夕凜凜外議謂二  
相頗有不和之迹覽輔臣奏疏憂愛懇切謂定大計於  
危疑誅大姦於倉卒勲在王室初無輕重何嫌何疑而  
至是吾惟丙魏同心房杜濟謀在平時猶然況危急存  
亡之秋乎盍念國事之艱協心同德日入都堂共議扶  
持宗社拯救生民之策勿以細故妨大計

賜夏貴詔

七月十一日

卿以身徇國家之急提兵力戰屢聞捷奏比者丞相奏  
事言卿素有勤王之志欲率義旅入衛惟江面未清少  
遲其行今秋風已動國事孔棘所憂在於本根吾聞淮  
西之兵多忠勇其民皆勁健卿舊德宿望諸將心服以  
樞府董六師吾事濟矣西閫之任卿宜暫委參佐亟戒  
徒馭組合熊羆之士援枹誓衆星馳而前以救危難尚  
念兩朝殊遇朝聞夕道吾之待卿猶唐之待子儀也

此漢

口陽羅堡喪師  
之後促之不至

賜李庭芝詔

二十四日

吾擁佑嗣君遺大投艱于身北敵憑陵國步孔棘用兵  
連年猶未掃除西風已動憂端方大卿文武為憲精神  
折衝分鉞十餘年威望具孚卿嘗有勤王之志吾念淮  
壖為畿輔屏蔽倚成興師復境之功今敵氛未退尤以  
根本為慮運籌決勝宜得知兵之儒協贊廟謨邇者命  
卿參預意實在此久當方面練習兵事無踰卿者用遵

慶厯召琦仲淹故事趣卿入輔指授當任可以破堅處  
置得宜可以平蔡其功倍於臨邊矣已命夏貴宣威兩  
淮趣其入維揚貴到卿即率良將勁兵星駕來朝惟時  
惟幾分陰不可緩卿其念之

時以夏貴為淮東制置召  
庭芝赴行在夏貴不受代

庭芝閉  
門自守

### 賜夏貴詔

吾趣卿來朝共濟時艱重惟秋風敵師未退以卿英名  
宿望精忠義槩固欲卿入贊帷幄以壯根本但念維揚



屏蔽淝右必淮堧保金湯之固則敵人有後顧之慮畿  
甸可恃以無虞今命卿甸宣之寄兼領兩淮卿忠忱體  
國宜星言夙駕以副注倚之意貴因陽羅堡喪師沿西  
南岸放火歸廬州其心  
已無國矣詔屢  
促之其肯來乎

### 勉諭夏貴詔

自敵馬飲江國步孔棘卿獎率三軍誓不與賊俱存百  
戰而氣不衰砥柱屹立于衆流橫潰之衝肆命卿以宣  
威開大閫於兩淮庶幾首尾相應茲覽奏牘知裕溪之

役行師失利卿跋涉險阻受任危難之間勞瘁至矣其撫勞將士集收精銳謹固秋防以圖再舉惟天助順有志竟成機會可進趣鎮維揚用集攘除之績

賜文天祥詔

卿倡義旅以衛王室秉忠忱以濟時艱爰咨常伯之英趣膺制閫之寄將士用命遂汎掃於敵氛精神折衝益振揚於勝氣有嘉體國之志亟奏攘夷之勲元戎啓行周邦咸喜載加錫賚式示眷懷

時天祥以江西提刑入衛陳宜中去位夢炎獨

相意不相樂乃以天祥守吳  
門除浙江制置知平江府


勉諭陳宜中詔

吾惟艱危之時卿以忠義之忱扶持宗祏一日去位吾  
如失左右手惠然肯來再登右揆用景祐名相茂典以  
遂謙沖之美國事日棘人心易搖非卿誰與鎮安羽書  
狎至諸將出師非卿誰與指授豈可以辭避之小節忽  
安危之大計俟邊境肅清國勢底定然後從容養志之  
樂可也今何如時而欲辭位趣承渙命以副具瞻

獎諭張世傑詔

卿首倡忠義率旅勤王屢收雋功攘却外侮英猷壯  
每懷嘉績歎敵謀叵測絕東淮之餽餉窺右淞之腹  
心我是用急卿進兵江潯焚其聚糧牽制敵勢使不  
得逞嘉乃茂績用錫褒書其率勵三軍乘勝電擊掃  
清賊壘以定王國

四明文獻集卷二



總校官候補中書臣吳紹濬

校對官待詔臣胡士震

謄錄監生臣金拔

欽定四庫全書薈要

集部

四明文獻集卷三

詳校官助教臣謝登雋



欽定四庫全書薈要卷一萬五千九百九十四

集部

四明文獻集卷三

宋 王應麟 撰

表

代皇子謝賜御書孝經十六句表

詞科第二場  
題丙辰二月

十三日

始于事親中于事君  
口無擇言身無擇行

滿而不溢高而不危  
天之經也地之義也

德義可尊作事可法  
通于神明光于四海

居則致敬養則致樂  
進思盡忠退思補過

伏蒙聖慈賜臣御書孝經十六句者睿謀垂裕夙承父  
訓之嚴神畫疏恩備舉聖經之要因心立教拭目知榮  
臣某惟夫子之發微言為曾參而陳孝道首述君親之  
事謹始及中復虞富貴之移戒危與溢身行口言之無  
失天經地義之兼該事可法德可尊表裏俱正居致敬  
養致樂造次弗違神明四海以交孚進退一忱而匪懈  
有倬飛鸞之翰於昭詒燕之謀二八句之特書撮其樞  
要千萬人之咸悅始于家邦仰倣邇英之屏俯殊制旨



之注矧熙朝資善之學肇祥符丙辰之春詔儒臣而續  
是經錫宸章而刊諸石洵觀洪藻宏賁前猷某德媿溫  
文性慙岐嶷出有師入有保蚤齒虞庠親則父尊則君  
恪趨周寢曩者分封之渙號誨之全孝以移忠旨趣會  
于五經未闕聖緼德教加于百姓徒仰皇明載覩河洛  
圖書之光如親洙泗問答之語茲蓋恭遇皇帝陛下學  
稽古典筆寓天常祚嗣萬年受祉而施于子冠冕百行  
得手而應于心約漆簡千有餘言洒灑珠六十四字淳

化祕丘之刻祖武可繩紹興方國之盼人文增煥臣敢  
不聿嚴琰寫式廣家藏仁孝製六章之詩遠邁唐宮之  
賜札夙夜事一人之訓緬思建邸之陳圖臣無任

按詞學指

南云表明也標也標著事序使之明白三王以前謂之  
數奏秦改為表漢羣臣書四品三曰表不需頭上言  
臣某言下言誠惶誠恐頓首頓首左方下附曰某官臣  
甲乙上陽嘉元年左雄言孝廉先詣公府文吏課牋  
奏又胡廣以孝廉試章奏然則章奏試士其始此歟唐  
顯慶四年進士試闕內父老迎駕表開元二十六年西  
京試擬孔融薦禰衡  
表則進士亦試表

代侍講說書官為經筵進講孟子終篇謝賜金

帶牙簡同侍讀修注官謝賜秘書省御筵及鞍  
馬香茶進詩表

臣某等言華光講藝備觀亞聖之書蓬省賜筵並錫多  
儀之寵感鴻恩而播詠瞻丹袞以颺言臣某等惶懼惶  
懼頓首頓首竊以漢帝論經虎觀侈賜衣之渥唐宗嚮  
學瀛洲疏給膳之榮意皆寓於隆儒禮植豐於接下矧  
軻書之眇指傳孔道之正宗由義居仁七篇之言靡不  
載垂憲詒後百世之王莫能違於穆熙朝若稽丕訓祖

禹闡明於元祐表臣敷繹於紹興逮聖神尊德以有為  
於問學逢原而自得細旃畫訪聆責難陳善之規我弁  
星環探知性盡心之蘊華編甫徹諛聞奚裨疇侍言誦  
說之勞暨著記纂修之職鏐輦絢采復頌象齒之珍玉  
筆示慈咸綴麟臺之席上泗式調于沃轡團龍交祭於  
竒芬稽古所蒙省躬莫稱歸美以報拜手載歌贊智聖  
之大成述君臣之相說辭陳約禮遠晞積翠之篇句寫  
賜賤俯效集仙之飲退慙斐墨曷對閔休茲益恭遇皇

帝陛下居安資深守約施博存神過化與天同流明物  
察倫取人為善覽大賢之論集興盛治之雍熙德醉從  
容秩太清之華宴幣將烏奕邁崇政之彞文臣等識媿  
寤疑恩霑同樂讀古書而尚友諒懷望道之思頌清廟  
以致平期盡正君之義臣無任

代宰臣以下賀奉安光宗皇帝寧宗皇帝實訓  
寧宗皇帝經武要略今上皇帝玉牒日厯會要  
禮成表

臣某等言文謨武烈並揚二后之休漢典唐經叅著二  
王之法森寶儲而日揭粲縟禮以星敷臣某等歡忭歡  
忭頓首頓首竊以監先憲求多聞商書垂範有常德立  
武事周雅紀功迨開成標帝籍之名暨魯史謹策書之  
體至若觀會通而行禮尤先撮機要以舉綱茲萃進於  
一時宜輯成於五典允哲光皇之揖遜於昭寧考之儉  
勤燕翼詒謀焜燿億萬年之訓攘夷復古堅凝三十載  
之規有嚴論述於史筵申命纂修於華省天啓離明之

治日新賁象之文洽媿化於登三煥鴻猷於襲六瑤編  
溫潤金匱閔嚴繫日繫時哀嘉熙淳祐之記注有倫有  
要粹寶祐端平之憲章討裁分飭於羣儒尊閣載差于  
穀旦韶鈞燧煜羽衛歲蕤絢繅采以展儀瞻冕旒而執  
讀事該經緯備清覽於邇英瑞集圖書肅秘藏于廣內  
恭惟皇帝陛下心傳精一學懋緝熙道德風烈之庶幾  
邇追來孝制度紀綱之能永勿替厯年功光祖宗政布  
方策率彝章而由舊據行事以鑒新文武大略舉焉聖

而繼聖禮樂庶事備矣書不一書臣等欽覲聲明欣逢  
熙洽始於勤而治內外願駿惠於閔募祓厥文而作春  
秋嗣鋪張於偉蹟臣等無任按此以上三篇蓋公詞科  
試中暨所業者觀其措詞  
立意前後次第豐贍密信所謂法度之文也近世文  
章之士能為麗語者甚多而識製作之體者絕少故其  
空疎繆戾有終身弗悟者矣若此  
三篇者宜表而出之以為矜式

宰臣以下賀明堂禮成表

明堂孔陽秩九筵之盛典聖人能饗申億載之宏休慶  
洽神人歡騰宇宙中賀竊以接三才之興嚴將禮于季



秋宣二祖之光協初郊於先甲物阜備有成之告民和  
皆至治之馨若昔燕詒自今駿惠恭惟皇帝陛下剛健  
中正悠久光明更化而福祿來迓續肇基之運修政而  
境土復恢弘再造之規觀其會通必于上下農扈奏屢  
豐之瑞邊陲凝耆定之勛精意以程良時之對在宮在  
廟觀盥之薦有孚于帝于宗泰元之策復始入時暘若  
德與氣游前星重七鬯之暉華景粲壁珠之象緝熙純  
嘏安樂太平永命而不厯年陳常于夏敷言而錫保極

有澤如春於赫漢儀以篤周祜臣等幸叨顯相欣覩熙  
成式典靖四方願進夙夜畏威之戒奉觴上曼壽聿觀  
癸亥宗祀之祥

按景定四年九月公自台州通判召為太常博士故事禮部郎官草百官箋表

博士禮部郎屬也

宰臣以下請度宗聽政第一表

景定五年十月

四海遏音遽切遺弓之慕百官承式有嚴嗣服之初跂  
望清光肅循大卞恭惟皇帝陛下聰明時敏聖知日躋  
龍樓庶務之參聞灼知政體虎闈三善之兼得允協人

心祇台德先迪從子保問安視膳冀文考之復初遺大  
投艱痛周家之降割未堪多難永言孝思然而色之戚  
哭之哀已孚輿望朝以聽夕以訪難曠繁機即位五始  
以體元踐阼三日而端冕惟哲作則示民有尊伏願適  
駿先猷勉尊中制法官親事乾首物而萬國寧司士詔  
儀德如辰而衆星拱

第二表

天眷命以為君誕膺傳序王眡朝而聽治艱執過哀未

拜詔俞洊陳衆籲若稽前聖之述作莫盛有周之纘承  
綴衣于庭既延元子而入翼室奉珪兼幣乃告諸侯而  
出應門豈於禮經以或違蓋欲邦彛之早正百篇軌範  
萬世法程恭惟皇帝陛下位履剛中體乾純粹南陽辨  
牘臣民知參決之機東序隆儒問學得修齊之要繼文  
下武戴舜同心嗣德在初靡替億萬年之敬奉先思孝  
必勤一二日之機黎元遂而後應之志深氛祲清而豫  
防之慮在聆王言而稟令瞻皇極以近光詎以宅憂稽

於聽事訪落率昭考之始如見羹牆輯瑞覲羣牧之儀  
益嚴堂陛

第三表

十一月

離兩繼明屢祈蒞政異重申命未忍行權深知聖學之  
純恪守禮經之正再三有瀆億兆同辭竊以於皇祖宗  
丕紹基緒內極哀恫于中禁外臨聽斷於治朝蓋愛慕  
發於中忱而觀瞻係于南面仰惟先帝奄棄羣臣痛切  
烏號愴道揚於審訓謀詒燕翼望開釋於至情亦念萬

機之繁用垂億載之裕恭惟皇帝陛下心舜文之與舍躬曾閔之所難麻冕黼裳思不忘于繼序飫食疏服敬欲盡於事親顧肇允集蓼之初有悠哉未艾之慮臣下罔攸稟令夙夜莫敢遑寧闢門達聰無待畢三年之制總綱明任亟思迪前人之光

第四表

萬邦仰照如日之升三請執謙于帝其訓達孝永言於承考微忠未効乎回天疊冒威嚴冀效俞旨惟元儲之

御極自至道之詒謀

闕

勉徇羣臣之奏西序眡

事靡逾六日之間蓋禮制之從宜念時幾之久曠哀未  
忘也俯而就之恭惟皇帝陛下清明在躬濬哲稽古致  
敬光四海不肅而成初服命厯年克謹厥始欲報之德  
遠省若勤矧修攘敷遺於丕謨而繼述可淹於庶務惟  
休惟恤有節有權伏望俯鑒輿情仰循舊典釋康王之  
冕喪期無改於內庭垂虞舜之裳朝位聿新於南面

第五表

知臨大君之宜羣心丕僖孝思下土之式四詔如初匪  
敢咸諫于王亦曰節情以禮竊惟倫制在乎兼盡經權  
可以並行未有命戒而居廬難遵滕國繼猶伴奭而謀  
廟必監周詩令敬通於神明且哀發於言語是亦為政  
顯若有孚矧導訓受琚之初俾聽法服縗之後考作室  
既底法筵我成功朝至是用和民所其無逸克紹先烈  
惟懷永圖慈良於喪倘未正路朝之位既降厥士亟當  
循便殿之儀伏願寅念燕詒於昭龍造即齋居而決事



新聖化以承休福威惟辟之尊四方來賀公卿奉職以奏庶績其凝

第六表

眡朝周典聿觀治化之新易月漢儀難執亮陰之舊五下明詔一哉聖心仰思慕之無窮繇敷陳之未至以喪與易寧戚雖致其哀禮因情為文必知所節練冠而親機務素幄而見臣隣古有行之時則可矣放諸四海而準孝已感于德元至於萬年惟王本實闕于初政體訪

落小疵之意躬天保采薇之勤豈必端憂乃為繼志伏  
願昇於衆感稽若邦彛昭德以照百官副玉几遺音之  
託正統而法五始衍寶龜申命之休

第七表

天作之君飛龍利見日致其孝隙駟易流若三年惟不  
言則萬事懼有闕謙沖已過震越靡寧竊以上聖每惜  
寸陰治象皆觀挾日嗣大厯服無咎恤成功受羣臣朝  
乃考圖敷賁此作新民之美化亦付有家之初心丕顯

孝皇祇承高廟執喪固踰舊禮涖政靡越旬時迪前人  
光為後世法恭惟皇帝陛下英姿繩武粹學察倫方裒  
集燕謀敷言是彛是訓念紹膺駿命無疆惟休惟艱遽  
臨舊貫之居永懷罔極之感哀難為繼德何以加伏望  
益廣堯聰少釋舜慕人道自始聽宜務於五先生者常

行節願參於四制

按公本傳度宗即位攝禮部郎官草  
百官表舊制請聽政四表以上一夕

入臨宰臣諭旨增撰三表公操筆立就丞相總護還辭  
位表三道使者立以俟公從容授之丞相驚服即授兼  
禮部郎官其載公敏捷如此以上七篇即宰臣諭旨增  
撰者觀其萃諸經史為一家言而變化開闔有如自然

所謂不期于工而自工者真自早年嘗讀其文至於成誦終不能髣髴其萬一而近世士大夫上書於朝乃欲禁絕偶儷其亦不思甚矣嗚呼使士大夫習為偶儷盡如公之為表亦何害其為文哉

請御正殿第一表

孝思維則勉旻政於內朝謙尊而光未詔儀於南面古有當陽之義今逾易月之期祇率彛章肅陳忱籲竊以聖作物覩大明生東廉遠堂高衆星拱北漢即位而坐前殿周報誥而出應門惟在德元以為民極恭惟皇帝陛下恪守堯喪之制丕承舜典之傳禮根於心治指諸

掌壁帛之召登崇譽髦絲綸之言拊勞邊戍鑒無逸而  
却貢獻體訪落而廣詢謀得於視膳問安之時形為繼  
志述事之美猶且對羣臣於素幄覽庶物於青箱匪昭  
名分之嚴曷聳華夷之望伏願鼎新百度臨照萬方黼  
坐衣裳法春秋而居正紫宸閭闔叅天地以宅中

## 第二表

小必求助聖化維新大昕眡朝邦儀由舊未回聰聽冒  
貢愚忠竊聞當宁所以答陽踐阼先乎謹始若稽至道

之要洵更朔旦之期蓋閭外之治斷恩禮弗敢過而天下之本在國分有常尊亦越淳熙於昭達孝謂德報罔極靡行漢制之權宜臣言屢陳勉從周誥之彛訓恭惟皇帝陛下繩其祖武察於人倫保右命之永惟堂播之托陟降庭止優若羹牆之思非但致哀於宮中將以顯式於宇內然布黃朱之乘容衛必嚴倣秦紫之居等威攸繫丕應後志于教圖功元首明庶事康有赫乾飛之造清風發羣陰伏共瞻履正之光

### 第三表

豐勿憂宜日中蓋循禮節離重明化天下丕顯君尊百  
命未俞一忱固請竊以允文先帝祇遙前猷宅恤永懷  
暫居便坐奏章三上亟御昕廷嚴著定以訓官常肅廉  
陞以隆國勢昔既勤止無替歷年今帥行之克施有政  
恭惟皇帝陛下就將典學聰哲冠倫眈朝遵孝祖之謨  
情所未忍繼序篤成王之敬思且不忘儼素韞之過哀  
豈黼宸之為樂惟體元而立制乃揚烈以覲光三朝受

圖則必臨周之路寢正月輯瑞則必親舜之法宮嘗瞻  
穆穆之容願釋皇皇之慕仰承畀付首庶物乘時龍俯  
示表儀使萬民觀治象

請上乾會聖節名第一表

咸淳元年正月

天生上聖丕昭震夙之符月在正陽允協乾嘉之會善  
治聿來於福祿大德必得於壽名宜新鳳紀之編式表  
虹流之慶竊以仁皇御極如歲之春炎祚融暉發祥維  
夏若稽資始之義用彰命哲之初昔以元長人於穆不



已今以亨合禮申錫無疆恭惟皇帝陛下剛健粹精居  
行聚辯儲英潛躍肇乘時於六龍膺運文明期咸寧於  
萬國闡河圖而毓瑞承祖烈以重光臣工奉觴忻千載  
之一遇侯衛執贄浹四方之大和輯詩雅歸美之忱贊  
易象為君之體既多受祉于永保民臣等不勝大願謹  
以四月初九日為乾會節伏望俯鑒輿情仰遵徽典南  
山獻祝薰風載詠於舜弦北闕臚歡湛露普沾於周澤  
著之令甲副在有司

第二表

德行以健萬年惟王禮觀其通四時合序取文言而歸  
美稽彛憲以抒忱溫詔弗俞愚忠洊瀆竊以書陳無逸  
之壽詩頌長發之祥粵若熙朝迪惟茂典太平纘服標  
令節於乾明隆興御圖表昌辰於會慶繼今述作復旦  
光華恭惟皇帝陛下貽哲在初體元立制中正備太陽  
之粹盡屏邪陰亨嘉輯一氣之和肇新治象凡化原之  
謹始皆易學之儲思福欲錫民名宜賓實尊為天子舜

其孝申命用休請祝聖人堯曰辭允恭克讓然虹電既  
昭於符瑞而川嶽來效於貢珍倘曠上儀曷彰盛際伏  
望丕從衆志祇適舊章班百僚之玉觴雖未展容於漢  
殿錄千秋之金鑑庶幾伸諷於唐臣

### 第三表

受命丕若歷年自今初服嘉會足以合禮與時偕行尚  
執一謙敢陳三祝竊以九重龍御握乾符稽帝文億載  
燕詒法仁祖體天德適觀舊典祇奉洪名既粹毓以紹

圖必體元而致治生生之謂易近取諸身巍巍其成功  
克昌厥後恭惟皇帝陛下緝熙聖學駿惠先猷立太平  
基運神心於博化開衆正路培善類於始亨惟性得陽  
明之純而政著日新之美宜參至健永保太和匪介祉  
之溢辭乃願忠之微悃伏望式篤周祜亟定漢儀夏見  
曰宗輯四方之來賀皇建有極衍萬壽之無疆

第四表

堯辭三祝未賜俞音虎拜萬年益循彝典惟聖意達事

親之本在微臣伸報上之恭謙尊而光禮時為大竊以  
乾行四德莫如盛夏之亨節紀千秋匪曰開元之舊若  
稽隆古丕顯宏休必得壽名中庸之稱舜孝篤生保佑  
大雅之詠嗣徽億載繼承二儀明察恭惟皇帝陛下有  
陟降率昭考之志有怡愉奉太后之心致永慕於諒陰  
遠迪淳熙之訓表誕彌於長樂近叅寶慶之規所謂盡  
制而盡倫斯可敬敬而教愛然念尊君之義盍嚴即阼  
之初始于家邦備訪落思齊之美申以福祿協臆驚既

醉之詩矧嘉會之忻逢斯羣情之共戴願符善頌亟詔  
攸司翼室興懷徐展紫宸之賀慈闈介祉聿先金鑑之

陳從答是期竭忱以請

是日兼攝翰  
苑撰允批答

理宗靈駕發引慰皇帝表

龜筮協祥既飭因山之禮龍輜整駕難淹同軌之期六  
紼天行萬方雨泣恭惟皇帝陛下紹休聖緒永言孝思  
致敬致哀放諸四海而準盡倫盡制定為三年之喪愴  
禹穴之將臨優堯塋之如見願承先志少抑至情

慰皇太后表

仙鼎登天鳥號永慕壽原卜日龍駕遂行四海攀摧六  
宮哀慘恭惟皇太后侔月久照協坤無疆周雅保佑之  
功敷遺翼子唐室怡愉之奉用懌慈顏願遵順變之言  
少紓追遠之感

慰皇后表

穀林卜吉遠日倣臨葆衛戒嚴溥天胥慕恭惟皇后順  
承聖孝式副婦儀周寢問安尚想龍樓之入禹山再竊

愴聞鳳翥之行柔衷諒切於哀恫衆志願祈於寬釋

靈駕至攢宮安寧慰皇帝表

仙馭在天肅漢陵之仗衛經涂如砥屆禹會之山川靈  
旆燕寧瑞氣葱鬱恭惟皇帝陛下緝熙于學慈良於喪  
翼翼厥德不回孝思惟則皇皇如望弗至明發有懷四  
方來觀萬年其永湯沐歸沛既安高寢之神羹墻見堯  
願釋舜心之慕

慰皇太后表



羽翽有嚴奉神儀而肅若川塗不聳次靈域以安然帝  
鄉之佳氣如初鼎湖之仙遊寢遠恭惟皇太后功參厚  
載德茂思齊近願漢官愴福寧之猶舊隄瞻禹會慨永  
穆之維新願紓哀戚之悼式燕怡愉之養

慰皇后表

珠丘蒼野仙仗安行玉座黃陵神游來燕萬靈拱侍七  
萃肅扶恭惟皇后篤耥民彝明章婦順輔佐聖皇之孝  
諒極慕思怡愉太母之顏願言開釋

謝賜御製牧民訓表

倬彼雲章懋昭彞教爾惟天牧誕保受民一札星垂四方風動竊以舜典咨于上日厚德允元周政灼于庶常有司是訓此帝王攸行之慮實造化日生之心皇矣熙朝率時丕範紫雲樓宴具發撫養之片言化成殿書不忘安樂之二字戒日詩之簡切守官箴之坦明亦越先皇於穆永命仁厚著論春噓露濡廉刑作銘日揭霜凜肆燕詒於奕葉式駿惠於宏謨恭惟皇帝陛下躬禹儉

勤性堯文思惟天既付疆土至于萬年御事越在甸侯  
若茲多誥凡曰之屏之翰飭以如家如身聖人情見于  
辭對時茂育邦伯念敬我衆致告自今臣分竹承休求  
芻盡瘁二千石謹養勉爾稱職之良五皇極近光恪奉  
敷言之正

謝賜御製牧民銘表

乾元長人培億年之邦本異重申令頒一札之仁言倬  
彼為章嚴惟丕式臣聞大君宗子以民為天有司牧民

于帝其訓肅若舊典光垂休銘太宗述膏脂之規著存  
戒石理考著廉刑之儆數錫臣工聖藻標乎日星皇澤  
深乎雨露凡在商畿周屏之列恪遵湯盤武席之謨一  
哉王心鑒于先憲謂戚忻之繫命繫爾守臣如痛癢之  
切身時予德意曰惠多誥其勑懋和昭回奎壁之躔永  
久甸侯之範恭惟皇帝陛下文思稽古清明在躬廣虞  
舜元日之咨遠邇無間法藝祖紫雲之戒撫養為先寵  
綏而作之師教告而至于再勉哉祇命陋開元愛人之

詩共此惟良軼本始夙德之詔寫諸琬琰佩若韋弦臣  
敢不勤毖官常欽承宸指山東布漢令咸知惻怛之忱  
天下誦堯言益謹寅清之職

進御製石刻摹本表

堯仁天覆煥乎文章漢札春溫詔于郡國賁飭昭回之  
藻異申牧養之言書紳祇佩於宸謨寫琰冒陳於乙覽  
恭惟皇帝陛下聰明寬裕剛健輝光相帝以綏四方閔  
民而惠多誥紫雲樓嚴藩侯之儆率循藝祖之規遜德

屏列守臣之名聿駿孝皇之典雨露至教日月羣心訓  
敕皇極之彝銘參戒石之刻越小大邦用勸垂億萬年  
無疆臣宣化罔功承休有恪念嘉師之保受懋顯命之  
對揚貫虹氣於山川寅仰清光之近盼龜書於奎壁肅  
登副墨之藏

賀皇太子賜名進封建國名表

多男授職保命自天貽命在初封建厥福宗祊景鑠宇  
宙頌聲恭惟皇帝陛下學懋察倫仁深垂裕寬厚祇承

於駿惠覃訏有衍於燕謀立愛而始于家嚴惟丕式受  
祉而施于子錫以嘉名謙沖循世子之規震長迪中興  
之典臣跡縻東土心拱北辰欣聆赤社之策書阻預彤  
墀之班賀本支百世載歌令聞之詩祚衍萬年益邁太  
平之雅

進功德疏謝獎諭表

堯封獻祝恪共臣職之常漢闕疏榮敷賁思言之獎對  
揚焜耀祇誦凌兢竊以億載登太平與天齊壽十行賜

方國細書成文貌如微臣欣際嘉會伏念某久濡雨露  
假守甸畿寬詔屢頒寅奉好生之訓頌聲允洽肅將歸  
美之忱便蕃宸指之褒烏奕侯邦之寵誤承茂渥曷稱  
隆私茲益恭遇皇帝陛下聖敬日躋聰明時乂華芝三  
萬歲於昭昌熾之符大椿八千秋有衍怡愉之慶聆忠  
規於金鑑介繁祉於玉觴既推育物之仁復厚遇臣之  
禮臣敢不益厲宣布欽佩瞻知千里溪山胥樂風薰之  
阜九霄綸綍仰瞻虹采之光



代賀改元寶祐表

寶龜申命延洪必世之休鳳厯更元迓續丕平之運風  
雷鼓舞日月光華竊以漢武改元朔之名適當癸亥之  
歲孝宣攷地節之詔越在壬子之年或即舊而鑒新或  
懼災而應變孰如昭代稽若先猷恭惟皇帝陛下睿知  
有臨嚴恭自度更化善治三十年政教之清燕翼貽謀  
億萬年基圖之永睦言歲紀已浹星終將順革以明時  
爰體乾而首物儉慈為寶永底蒸民之生保祐自天庶

幾二祖之烈嘉名有倬駿命惟凝某幸際泰亨聳聆孚  
號法春秋而謹始敢貢愚忠與士夫而勵精欽承德意

代賀皇子忠王行冠禮表

寶祐二年

上聖詒謀茂毓成人之德初陽展采肇稱冠阼之儀華  
夏臚歡宗祊錫羨竊以十五志於學備禮所以正容萬  
億年之休重本在於敬始鋪觀舊典莫盛祥符玄袞介  
圭錫命甲寅之歲華纓戔笄辰令月之冬適駿有聲  
克開厥後恭惟皇帝陛下體元首物立愛始親慶垂萬

世之基教子必以禮樂忠為百行之冕稽古建爾國家  
睠言復七日之剛卜協震洊雷之長主于尊屬酌開元  
太極之彛賓以輔臣軼五鳳孟春之詔有儀可象爰字  
孔嘉重曜宣光盼璧珠於紫極三加薦醴節金石於黃  
鍾受周祉之無疆卜漢儲之早定天迪從保邦永孚休  
臣越在邇藩頌聆懿鑠既冠而明有敬奚煩賈誼之規  
會卽而稱无雙莫預黃香之列

擬國史院進光宗寧宗寶訓表

盛帝重光垂百王之丕式大君繼序輯二典之宏規萃

篇目而臚分晉嚴

闕

而露奏竊以大禹貽孫之則著在

夏書武王燕翼之謀播于周雅允鑠兩朝之懿於昭載  
籍之傳光宗皇帝遙駿有聲嚴恭自度剛健以新其德  
躬覽政機精一而執厥中心傳道統寧宗皇帝始終典  
學玄默化民無怠無荒三十年之享國曰慈曰儉六五  
帝以匹休作者聖述者明顯哉謨承哉烈豐功懋德編  
之詩書美政嘉言布在方冊天開累洽日闡大猷抽金

匱之缺遺哀蘭臺之紀載粵若紹熙之嗣服施于嘉定  
之守成任賢修己之遠謨立武復疆之要略寫之琬琰  
炳若丹青主善為師恢至道示軌範有條不紊揚洪烈  
章緝熙冠周史之寶書軼楚臣之訓典寅上西清之御  
佇嚴東壁之諸恭惟皇帝陛下志篤昭功治隆繩武念  
茲皇祖鑒成憲以無愆迪惟前人式厯年而勿替適追  
來孝率人槩彝法二后之不敢康作一藝而闕罔極用  
訓丕德其永孚休臣等載筆非長總綱有媿承明登進

又新天聖之盛儀大清覽觀願舉寶元之故事

代先君謝賜御書竹林汲古傳忠六字表

淳祐十一

年

晝日接三承金華之殊渥帝書策一駭圭窬之榮觀鳳  
函飛下於九霄虹采輝流於六瑞窺文有耀拜貺祇欽  
竊以德星之題嘉孝友之為士法飛白之賜美忠節之  
贊皇猷咸因書圃之娛用錫儒纓之寵矧聖學根原於  
六藝而宸章冠冕於百王若至和詞林之書申褒邇列

昔淳熙石湖之翰數賁舊儒詎圖螢爝之微亦覩龍鸞  
之妙伏念臣學慙淇澳節慕泮芹經術淺蕪異綆泉之  
深汲聖聰密勿思牖約之納忠將爲子張書紳之規敢  
效劉洎登牀之請銀鈎挾藻寶軸舒華燧然袞字之褒  
粲若珠璣之麗顧瞻榆景猶夜燎之對朝陽捧玩蓬簷  
駭褐衣之被明月仰佩隆儒之睠共夸稽古之榮茲蓋  
恭遇皇帝陛下淵懿冠倫緝熙顯行覽盤銘而敬德日  
新又新悟筆諫以飭躬心正則正堯文有煥義畫入神

循太清羣玉之彞徧延義邇英之彥肆昭回之下飭殆  
誦說之未陳臣敢不紹衣德言對揚休命日月光華復  
旦幸瞻卿霽之祥山海時節來朝永寶宸奎之秘

代先君謝賜御製周易徹章詩表

淳祐十三年

寶符挾藻寫義畫之粹精翠琰垂芳備虞廷之賡載輝  
騰奎壁榮被簪紳若稽皇朝深造易學便殿述乾元之  
剛健成均陳泰道之感通祥符製三章而示儒臣紹興  
書二卦而賜宰輔洪惟上聖允迪前猷朋來益助之龜



日新其德惠浹濡

闕

之燕情見乎辭發陰陽闔闢之機

播日月光華之詠穗書再刻瑤軸俯頌恭惟皇帝陛下  
極深研幾精義致用蓄天在山中之德學懋緝熙渙風  
行水上之文心潛經緯聖緼達忘筌之妙宸章昭鏤玉  
之傳於赫賁觀敷同晉錫臣胄無色線袖有驪珠七言  
屬和於栢梁莫陪俊彥百詠輯成於離正徒仰文明

代進放生池御札摹本表

久道化成配天其澤好生德洽與物為春焜耀十行涵

濡萬彙於穆仁皇之盛治聿嚴景祐之聖謨湛露宴飲  
之儀自奉有節行葦忠厚之意各得其宜肫肫發育之  
仁永永鴻長之福恭惟皇帝陛下命凝鼎正德體乾元  
瑞紀流虹茂膺必得壽之祉愛存避蟻益普欲並生之  
恩恐朋酒殺羔之傷和景正旦放鳩之示惠推此一念  
宜于億年臣祇覲奎光肅登琰刻廣克仁術願探孟子  
之忠摹寫宸章敬上真卿之頌

代賀皇子加兩鎮公主進封昇國表

寶祚申休昭格乾坤之貺璿源疏渥式符震巽之亨慶  
輯宗祊光增簡冊竊以漢封帝子兼國十城周重王姬  
下后一等未有附鄂聯輝之盛誕膺絲綸並命之榮雙  
節建旄貽遠謀於燕翼大邦徹土協佳氣於龍蟠彞章  
稽列聖之傳美號取陪京之舊匪直親而賢賢用彰  
蟄蟄以繩繩恭惟皇帝陛下學粹察倫德深垂裕主器  
莫若長蚤諭教以正名立愛始于家成肅雖而流譽克  
昌厥後載錫之光百世本支衍綿瓞穠華之祉萬年祚

嗣軼猗蘭仙李之芳臣幸玷觀風欣聆渙號宜民假樂  
願歌右命之章占夢斯干遂致中興之治

代知舉謝賜御札表

三紀移風丕闡文明之化十行賜札聿求經濟之才天  
藻昭回時髦興起竊以熙朝稽古進士設科開寶宏規  
親試否臧之下慶厯盛際通考策論之長無競維人有  
常立武萃強本折衝之彥凝理內御外之功大哉王言  
監于先憲訓辭深厚煥有三代之風俊良登崇庶幾二

祖之烈飭道司而決擇廣多士之蒐羅祇聆絲綸咸知  
標準茲蓋恭遇皇帝陛下道行常久德運乾元菁莪之  
澤既深采薇之治尤重籌邊體國將因言而察能尊主  
庇民俾由學而致用明謨所迪美習維新臣敢不精以  
掄才公而率屬選士考實行復觀儒效之真得賢立太  
平益迓至圖之永

擬賀郊祀禮成進詩表

萬年敬休方茂成王之德上日肆類率循虞帝之初乾

端坤倪之燕娛月御星驅之鵠吉嘉氣液洽治象融明

昔孝祖乾道之元行郊禮孟春之朔欽柴而美光燭奠  
胙而慈顏愉維清文典肇禋思皇多祐於赫湯孫奏假  
申錫無疆恭惟皇帝陛下聰明宅中仁儉自度恭默三  
祀在宮在廟不顯亦臨兢業萬幾治內治外於神可告  
乃殷薦於豫順乃孝享於萃亨多士駿奔走而佁從四  
方大和會而來祭蕭脂以興嗣歲黼黻以歌青陽作蒐  
禴宮登奉徽冊用騁太室肆裸鬯圭芳扈泰時之觚壇

盱飾甘泉之鹵簿，羶案皇卽繭牲桂尊燿火舉而澹高。  
旂瑄玉奠而熙純嘏，翠鳳迴軫金雞舒恩簇仗正太極。  
之朝簪花介長樂之壽，哀時之對惟聖為能。臣幸扈屬  
車肅瞻釐席正月見祖奏元和億載之詩，千春獻祥續  
臣甫三禮之賦。

代饒禮侍謝太中大夫表

自天有命甫玷貳卿，累日為功亟躋四品。被絲綸之溫  
厚，增筆橐之光華。維聖朝優法從之恩，同漢制易諍臣。

之秩以德詔爵建官維賢如臣慙愚奮蹟塵俗小宗伯  
之職濫綴攝承列大夫之官退安留滯會課雖逾于七  
載計勞無補於萬分忽末路之際逢越常塗而登進若  
稽在昔尤重此階賈誼草儀爰錫超遷之寵申公議禮  
乃膺即拜之榮皆褒異於宏儒俾討裁於鉅典臣何能  
者心切媿焉仰窺訓迪之猷俯極滿盈之懼恭惟皇帝  
陛下聖神天運剛健日新煥帝堯之文章百工熙績明  
成周之黜陟八柄馭臣將磨厲於人才用恢張于治具



肆放茂渥匪曰彞規臣敢不精白承休靖共好直諷諭  
盡忠孝勉企前修典禮觀會通願裨美化

代王牒洪兵書謝成轉通議大夫表

事書於策效韓筆之鋪休言出如綸拜漢廷之增秩三  
長無取四品有榮竊以史莫嚴於寫琰之藏德莫盛於  
鏤玉之術在祥符則安仁立精簡之例在嘉定則章穎  
裁刪潤之規凡懋賞於汗青必服勤於副墨如臣者學  
慙實用世沐殊恩承先人之舊聞切希遺直奏從臣之

薄技敢與斯文春秋一辭之未能日月末光之難寫傳  
言虎觀仰帝學之緝熙倬直鸞坡聆聖謨之深厚舉宏  
綱而紀實申景鑠以告成然總綱維碩輔之功纂輯乃  
羣臣之助臣何力之有命錫紫泥今稽古所蒙階升黃  
散寵光特異駑鈍奚勝恭惟皇帝陛下剛健日新聰明  
時入倬彼周王之壽考敷遺燕謀煥乎帝堯之文章丕  
揚鴻烈立政堅于金石作政儷于璠璣與史並驅編詩  
書而無媿奏篇稱善示軌範而可行登崇峻宇之儲鳥

奕褒章之渥臣敢不肩忱報上佩訓教忠近臣盡規倘  
可通於末議王度如玉願無怠於太平

代洪兵書謝表

武部隣班屢自天而有命文章率屬未滿歲而為真揣  
分僥踰承恩兢惕竊以國有六職司戎獨省文書天生  
五材明政必及閒暇方采薇之治小愒而徹桑之備有  
嚴元祐息兵用蘇軾詞章之彥乾道復古召黃中耆艾  
之儒是以道德成乎安強名實加於上下如臣末學敢

跂前修翰墨非長叨世掌絲綸之美弟昆迭進愧才皆  
經緯之稱粗守樸忠躡居華胄俎豆之間未學軍旅承  
攝無虞甲兵之問不至廟堂簡稽何補久抱羞於辰屨  
俄正秩於夏卿帝有恩言循墻靡獲官皆民譽竊位是  
慙欽哉訓迪之明惕若滿盈之懼恭惟皇帝陛下行周  
法度勅舜時幾假有廟以除戎益謹不虞之戒尊上帝  
而籲俊灼知常任之臣懷遠先政事之修強本多雋英  
之進顧令迂懦亦預褒升臣敢精白承休靖共好直既

莫遂蔡謨之遜再登納言願恪勤程伯之官復歌常武  
代謝華文學士知寧國表

夏卿曠職甫從南晦之耕虞閭通班驟假左符之寵霜  
露皆至人之教乾坤本生物之心聖度恩深孤危分溢  
伏念某才非濟美任適逢辰叨世掌於絲綸奚施潤色  
積歲遷於曳履無補論思顧竊位以包羞願推賢而報  
效臣心如水難自信其靡他考槃在阿蓋久知於宜去  
矧嬰衰疾屢控忱辭陳力不能難追春秋之責奉身而

退幸回日月之光念朝陪入說之聯迺夕下出藩之詔  
宛陵山水之郡懷紱有榮太微奎壁之躔遺簪罔棄詳  
試于外式華其歸省躬滋懼於異升申命莫逾於頻異  
恭惟皇帝陛下知人則哲聽德惟聰設禮義遇其臣隆  
褒盡下無黨偏會有極觀過知人睠累牘以祈閒畀一  
麾而從欲臣誓堅晚節期報春暉汲黯田園弗任淮陽  
之治子牟江海敢忘魏闕之忠

冬至賀表

陽剛七日復亨見天地之心聖壽億年泰元增甲子之  
筴祥開霄極慶浹寰區恭惟皇帝陛下寅畏嚴恭高明  
悠久合八音於律呂和以致和齊七政於璧珠旦兮復  
旦對履長而有慶行乾健以無疆某欣際昌辰敬裒嘉  
頌光依漢殿相百辟之奉觴歡動唐宮詠五紋之添線  
前題

甲子上元新漢儀之候景天正長至儼唐殿之受朝瑞  
靄九霄歡騰四海恭惟皇帝陛下躬行乾健心玩復文

俊又登崇見陽剛之懋長慶垂靖謚知陰慝之潛消  
協氣於埏垓等睿齡於箕翼某叨躬麟定肅造鴈行億  
載萬年申祝後天之算五紋六琯共陶化日之和

景定五年

咸淳元年兼沂  
清忠王府教授

# 露布

晉前鋒都督平兗青州露布

詞科試  
擬進卷

尚書五兵臣元等言臣聞天下之義當混為一我伐用  
張仁人之兵所存者神無遠弗届迪上帝命付中國民



徐方既同而來庭宣王復古齊地悉平而振旅世祖重  
光整我六師如雷霆植十二部之旗鼓不圖今日載纘  
武功恭惟皇帝陛下體乾粹精位履中正凝江寧神璽  
之祚至于萬年開吳分歲星之祥綏以多福有方行海  
表之略無宴安江沱之心惟氏鞠凶至堅孔熾吞燕涼  
而薦食介鱗易我衣裳闖荆益以長驅蝨賊荒我居圉  
敢行稱亂不戢自焚師克在和雖武騎無所用天功者  
順聞風鶴皆為兵一戰成肥水之勲三捷取壽陽之境

匹馬騎輪無反乃滅而亡簞食壺漿以迎曰孫子后謳  
吟思漢震動附周臣安請乘破竹之機分命采薇之率  
復舊都在此行也清四海可失時哉臣等以先啓行敷  
奏其勇辟四方徹我土誕將天威獎三軍定中原剪此  
朝食推鋒而造渦潁抗旌而次彭城彗掃星流席卷雲  
徹欲快心於狼望庶舉秦若鴻毛虓虎濯征困獸猶鬪  
張崇守兗河而假息苻明據青社以每生食棗靡懷寢  
薪莫悟矧河南城堡之皆附寧山東德化之未孚乃遣

劉襲攻郢城崇棄甲而遠遁復俾高素向廣固明因壘  
而來降穆如清風丕冒出日齊變至魯魯變至道載戢  
干戈汶達于濟濟達于河底謹財賦遂鼓行於司豫汜  
盪穢於羌髻時靡爭而心載寧君之訓而臣何力斯皆  
帝德廣運聖武布昭歸鄆謹田用儒無敵揚文武烈圖  
功攸終予以正六龍御天之居豈止保一馬渡江之緒  
臣等共武之服復天之靈洛邑朝諸侯翠華之回軫  
營丘發嘉號埃王縣之修封臣等無任慶快激切屏營

之至謹遣某官奉露布

按詞學指南云露布之名始于漢漢制詔三公皆璽封尚書令

印重封露布州郡祭祀志注引東觀書有司奏孝順號露布奏可又鮑昱詣尚書封胡降檄曰故事通官文書

不著姓又當司徒露布李雲露布上書注謂不封也魏

改元景初詔曰司徒露布咸使聞知蜀漢建興五年春

伐魏詔曰丞相其露布天下此皆非將帥獻捷所用通

典云後魏攻戰克捷欲天下聞知乃書帛建於漆竿上

名為露布自此始也王肅獲賊二三皆為露布韓顯宗

有高曳長縑虛張功捷之譏孝文稱傳修期下馬作露

布齊神武破芒山軍為露布杜弼即書絹不起草唐制

下之通上其制有六三曰露布兵部侍郎奉以奏聞集

羣官東朝堂中書令宣布張昌齡為崑丘道記室平露

茲露布為世所稱于公異為招討府掌書記朱泚平露

布曰臣既肅清宮禁祇奉寢園鐘虞不移廟貌如故德

宗咨歎焉東晉未有露布隆興初以晉破苻堅命題似

有可疑然文章緣起曰漢賈洪為馬超伐曹操作而魏志注謂虞松從司馬宣王征遼東及破賊作露布隋志有魏武帝露布文九卷世說云桓溫北征令袁宏倚馬前作露布手不輟筆俄成七紙則魏晉已有之宋王元之擬李靖平突厥露布此擬題之始歟

唐劍南西川節度使同中書門下平章事破吐

蕃露布

臣聞天討有罪兵應者勝義者王王于出征師直為壯曲為老多助之至四極爰轅貞觀則同羅擊延陀開元則九姓殄默啜曰商莫不來享犯漢雖遠必誅德風翔

乎河源武節愔乎月蝟率寧人之有指先元戎之啓行  
用信威光祖宗不以賊遺君父恭惟皇帝陛下宣昭義  
問救寧武功纘八葉之鴻圖奮四征之雄略懷梟鳴銷  
稔沴稟印太和剪鯨鯢清郊原掃除羣穢王猷允塞我  
武惟揚奇幹善芳各修貢職條支若木咸順指令邈積  
石之遐陬有吐蕃之醜類侵敗王略倍奸齊盟乘邊將  
之騁兵瞰戎亭之虛候為蛇豕食上國盡盜河湟帥蟲  
賊搖我疆再驚畿甸騎塹敢於深入鑾蹕至於親屯擱

然授兵協以謀我尚納汙而含垢姑通使以結和清水  
之盟未乾好時之師已聚指涇靈而徼賂闖益夏以擣  
虛夷德無厭弗悔衽金之禍楚氛甚惡輒興衷甲之謀  
蠢爾為讐整居匪茹維時南詔慕化中朝先零之質諸  
羌雖嘗并力麋人之率百濮罔不離心頓顙于邊受命  
于吏斷匈奴之右臂羈南粵以長纓燕貉輸致騎之勤  
晉戎成犄鹿之勢彼既失鐵橋之險我遂克峨和之郛  
盍竄匿於龍庠復虔劉於麟塞戕我守將墮我陴隍修

戈矛與同仇靡室家不遑處臣等請奮其旅以殲乃讐

鳳翔振武靈武之騎獵其西邠寧太原涇原之兵震其

北率山南熊羆之校暨東川貔虎之師烏蠻撓其腹心

回鶻擣其肘腋衆素飽矣一大治之諸將陳洎等統五

萬軍出十一道濟師西颺之半策勲北陸之初盪平七

城斬馘萬級獲鎧械十五萬計燔堡壘百七十餘遂賈

勇而圍昆明將乘勝而定青海僞東境五節度大使論

莽熱釋朔方之衆援維州之城九攻九却之計窮七縱



七禽之威速連連執訊矯矯獻囚不然我薪而自焚有  
如破竹之立解拂廬魚潰甌脫兔奔谷靜山空行就焉  
耆之僂區殫域滅汙聞智盛之降斯皆廟謨淵深神斷  
天造明見萬里運奇掌上之兵守在四夷制勝目中之  
虜勒功滇池之柱植表赤嶺之碑一怒安民文之勇也  
三軍用命克何力焉臣等承帝之明敵王所愾開遠門  
揭候坐收西極之舊封紫微殿受俘重覩崑丘之茂績  
西山先生曰露布貴奮發雄壯少麤  
無害不然則與賀勝捷表無異矣

檄

漢丞相諭告巴蜀檄

漢元年夏四月丞相何諭告巴蜀郡縣蓋聞天之所助者順民罔常懷懷于有仁秦失其正豪俊麋沸雲擾摩牙而爭之惟漢王先入關扶義而西為百姓請命秋毫無所害代虐以寬若時雨降民大悅項王滅德作威為天下宰不平反易天明思肆其罔極義帝越在荊蠻未有攸底漢王失職之蜀民亡不恨者項王有背約之名

天下畔之諸侯之兵四面而至夫一里之厚而動千里之權者地利也昔秦西有漢中南有巴蜀謂之天府沃野千里餘糧棲畝轉粟西鄉方舟而下天所以資漢也秦三將亡尺寸功鬻其國而王之慈父孝子將接刃以復怨及其鋒用之若奔兕之觸魯縞未足以喻其易王已拜大將軍信決策東伐朱旗一麾三秦必從風而靡被山帶河四塞以為固乘利席勝人人自為戰雖有智者不知為楚計矣項王亢不乘奸齊盟不順所過殘滅

不仁師曲為老其彊易弱傳曰不嗜殺人者能一天下  
湯武是也漢取天下可以萬全巴蜀固多奇士有從漢  
者尊顯之雲起龍襄維其時矣爾父兄其率子弟比善  
戮力墾苗除害毋陰拱以觀其孰勝王之入關悉除去  
秦法舊染汚俗咸與維新縞素為資珍物無所取非富  
天下也養其民以致賢人行仁政而王莫之能禦也楚  
雖大何畏焉用厯告爾新造邦尚永力畋爾田寧爾居  
毋蠢不靜以自速辜吏以仁誼教訓辨告勿行苛政明

聽之母忽

詞學指南云檄軍書也東萊呂氏曰晉侯使呂相絕秦檄書始于此春秋之世鄭子家使

執訊與書以告趙宣子晉之邊吏責鄭王使詹伯辭于晉王子朝使告諸侯皆有檄之名戰國時張儀為檄

告楚相其名始見

魯仲連為書約矢遺燕將秦尉它移

檄蒯通說范陽令曰傳檄而千里定韓信曰三秦可傳

檄而定漢有羽檄顏師古曰檄以木簡為書長尺二

寸有急加鳥羽示速也急就篇注檄以木為之長二尺

說文亦云二尺書李左車曰奉咫尺之書自相如之後

檄書見史策者不可勝紀揚雄曰軍旅之際飛書馳檄

用枚舉謂其為文敏速也唐以前不用四六周益公擬

漢河西大將軍諭隗囂倪正父擬晉奮威將軍豫州刺

史論中原豪傑皆用四六然散文為得體如東萊漢使

喻莎車諸國是也釋文曰檄激也文心雕龍曰檄皦也

宣布於外

皦然明白

唐河東保寧等軍行營副元帥諭晉隰慈州檄

興元元年八月某日河東保寧奉誠軍行營副元帥北  
平郡王燧檄告晉州要君廷珍隰州毛君朝敷慈州鄭  
君抗及將士吏民等蓋聞率土莫非臣盍念在三之訓  
明王伐不敬有嚴討貳之刑義士不求生以害仁智者  
能轉禍而為福其畢棄舊咸與維新我國家九葉繼明  
億年凝命天保以上采薇以下內撫外綏濮鈎于北祝  
栗于南德洋恩普神旌遙引窳窳咸誅堯治時雍猶有

青丘之梗舜仁天幃未除丹浦之凶李懷光奮渤海之  
俘授蒲津之節始謂狙之作使不虞鷹之易颺犇命醴  
泉粗展勤王之績請朝行闕輒衷犯上之謀猶念前勲  
屢靡好爵張萌芽於霜電悖木水之本原升鸞之謀肆  
行巢父之使弗返奪二軍而殲良將剽三邑而剪近畿  
豕心莫悛鶚音不革已復漢京之日月載揚周旅之霆  
雷幕府承命齋壇建牙列鎮正正之旗堂堂之陳莫敢  
我承赫赫厥聲濯濯厥靈有征無戰渾侍中率同陝之

士韓僕射統邠寧之師唐節度虎視廊坊駱將軍熊峙  
鎮國風雲助氣草木為兵詔參伐以清氛命招誓而繕  
怒不竢前茅之邁將成獨柳之誅惟爾三州之士夫夙  
被累朝之德澤嶠從處仲適受逆汙遵事隗囂豈為賊  
守鼎魚假息穴兔陷危犯大義者衆必攜作不善者神  
弗赦歷數古今所記未聞叛逆獲全惟岳阻兵汜膏齊  
斧朱泚竊號亦梟藁街矧茲狄孥敢干天罰犬馬猶有  
主覆載不容鯨鯢取以封脅從罔治聖上禹湯罪己文



武行仁凡鳴狐假王之妖首鼠觀釁之將莫不匿瑕宥  
戾除垢滌郵雖三子猶存蓬艾之間豈太陽不回葵藿  
之照尚式王命共惟帝臣勿相依於輔車以俱焚於玉

石倘能洗心效順解申來歸勩獻關東疏封帶礪融全

河右紀烈旂常若迷復怙終猶豫不斷蹈于顯戮謚為

至愚豈惟敷虐多方亦將遺臭千載請擇二者永肩一

心者定爾功復見弓橐而戈戢式化厥訓庶幾世變以


風移檄到如章書不盡意

劉勰文心雕龍曰祭公謀父稱文告之辭即檄之本原戰

國始稱為檄凡檄之大體或述此休明或叙彼苛虐指  
天時審人事算強弱角權勢標著龜于前驗垂輦鑑於  
已然譎詭以馳旨煒曄以騰說故植義颺辭務存剛健  
插羽以示迅不可使辭緩露板以宣衆不可使義隱必  
事昭而理辯氣盛而辭斷此其要也冊府元龜序曰暴  
揚過惡張皇威武使忠義奮發而邪謀沮壞論去就之  
理陳逆順之狀俾之改圖易轍轉禍為福誕  
告士民使知不獲已而用兵非無名而黷武

四明文獻集卷三

謹案第十八頁前七行伊蘇舊作也速今改二  
十頁後三行巴延舊作伯顏今改後倣此



總校官候補中書臣吳紹潔  
校對官待詔臣胡士震  
膳錄監生臣金 拔